



Cantiques dé Noué en Jèrriais

Jèrriais Christmas Carols



L'Office du Jèrriais

**Eune collection d'cantiques dé Noué et
chansons d'Noué en Jèrriais**

(édition Décembre 2025)

Cont'nu

À haut à marchi	124
À la Sainte Lucie	132
À travers les montangnes	40
Anges des régions dé la glouaithe	21
O Arbre dé Noué	17
Atout jouaie dans l'temps jadis	28
Au bèr du saint êfant	122
Aussi bein qu'les Trais Rouais	92
Ayiz eune jouaiyeuse et bouonne Fête dé Noué	123
Les bein bouonnes bêtes	85
Des bèrgers gardaient lus troupieaux	26
Béthléhem	136
Béthléhem chante à ces sé	54
Bouanne Fête dé Noué	131
Lé Cantique dé Coventré	151
Lé Cantique dé la Sèrvelle dé Noué	147
Lé Cantique des Annimaux	160
Lé Cantique des Brandons	159
Lé Cantique du Coucou	117
Lé Cantique du Pommyi	126
Cantique du Sussex	33
Lé Cantique du Tchoeuryi	146
Lé Cantique du Vièr Noué	155
Ch'est la Sèrvelle dé Noué!	80
La Chanson d'Noué (Y'a des mârrons à rôti sus l'feu)	154
Les clioches dé Noué	143
Clyînclias! Clyînclias! Clyînclias!	101
Couochi dans eune établ'ye	84
Craûle douochement, bèr	140
D'main	36
Dans la Cité du Rouai Dâvi	32
Dans la vielle ville du Rouai Dâvi	56
Dans les cieux	161
Dansons lé tou dé l'arb' dé Noué	148
Donne-mé man Noué aniet	133

Dors saint êfant	60
Les Douze Jours dé Noué	22
Dréлиндgettes	87
L'Êfant à Béthlém	96
En Galilée i' nos est dît	138
Êtaile du ciel	46
Êtailes, étailes	58
Lé Fis d'Marie	50
Habil'-ous don!	72
Eune hardi bouonne bordée d'Noué	109
Hèque Saint Nicolas!	98
Lé housse et lé hierru	12
I' tchait d'la né	62
Ideo Gloria in Excelsis Deo	20
J'îthons chantant à Béthlém	114
J'ouïs les belles clioches du Jour dé Noué	75
J'sommes trais Mages	52
J'vos souhaitons un jouaiyeux Noué	10
J'voudrais qu'ché sait chèque jour lé jour dé Noué	152
J'y chantons not' hodgîngnole	130
Jé m'rad'dai siez mé ches Noué	157
Jé vai les vailes dé trais batchieaux	66
Jésû Christ lé bieu pommyi	76
Jésû est né	38
Jésû est né!	106
Jésû veint au haut dg'ieau	149
Lô-lô achteu p'tit Jésus	121
Un Lô-lô d'Noué	125
Man tambour	59
Mé, j'voudrais vaie un bieu blianç Noué	145
Mînniet, Chrêchiens	105
Né v'chîn les papillons dé né	111
Nos v'chîn dans la ville d'Dâvi	94
Ouai-tu la sonn'nie céleste?	35
Les ouaïsieux dans lé gardîn	128

Ouï'y'-ous la chanson dé jouaie?	68
Ouï'y'-ous, ouï'y'-ous, gardeurs d'brébis?	116
Papa Noué s'en veint en Jèrri	82
Par les chénolles crève-tchoeu	118
Paradis d'hivé	65
Parmi la g'lée d'hivé	16
Pétite âne	70
O pétite ville dé Béthléhem	42
Prans du housse	27
Lé preunmié Noué	18
Qu'i' tchaie d'la né, tchaie d'la né, tchaie d'la né	142
Quand un p'tchiot est né	113
Qué Dgieu vos garde heuteurs, bouannes gens	14
Rêjouiss'-ous tous!	64
Rêvil'-ous touos!	108
Rudolf lé chère au rouoge nez	49
Saûticotons à Béthléhem	78
Sav'-ous comme tchi craît' des arb's dé Noué?	156
Sonne les clioches	34
Sus l'coup d'mînniet les bèrgers ouïtent	30
Taïs'-ous, taïs'-ous, viyiz lé p'tit êfant	44
Tch'est qui s'est pâssé à ces sé?	134
Oh tchi douoche niet	11
Tout chein qué j'veurs chu Noué est té	89
Trais rouais d'l'Êst, hoummes avisés	139
Vé-t-en, bouoillon dé toute bouônté	104
Viyiz, blianc dans les bonds d'né	97
V'là qu'ou r'quémenche, la saison dé nos rêjou	150
Oh, v'nez, oh v'nez, Emmanuel	8
Oh v'nez, touos les fidèles	6
<i>Index dé titres dans les langues originnales</i>	162

Oh v'nez, touos les fidèles

Oh v'nez, touos les fidèles,
Jouaiyeurs et triomphants!
V'nez, v'nez, oh, v'nez, v'nez à Bethléhem.
Viyiz lé né,
Rouai dé touos les anges.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Dgieu dé Dgieu,
Lueu dé Lueu,
Dé la Sainte Vièrge, il est né
Lé vrai Dgieu,
Né pouor nous, pas créé.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Mages, m'nés par l'êtaile,
Adouothant l'Saint Êfant,
Li donnent d'l'enchens, d'l'or et d'la myrrhe.
À ch't êfant Jêsû,
Nous, j'offrons nos tchoeurs.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Laissant lus troupieaux,
Les bèrgers sont app'lés.
Humbliément don i' s'en vont jusqu'au bèr.
D'un pas jouaiyeux,
J'y hâtons étout.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Chantez des cantiques,
Anges et hoummes ensemb'lye!
Auve les vouaix dé touos les tchoeurs célestes:
"Glouaithe sait à Dgieu,
Dans les pus hauts lieux!"
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Lé Nouveau-né
Tch'appathut aniet,
Jésû, la glouaithe sait à té:
Du Péthe Êtèrnel,
La Pathole en chai.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Oh, v'nez, oh v'nez, Emmanuel

Oh, v'nez, oh v'nez, Emmanuel!
Acheteu libéthez Israël
Tchi gronne et plieuthe à san tout seu,
Sépathé du Fis dé Dgieu.
Tchi jouaie! Tchi jouaie!
Emmanuel
Est né pour té,
Oh Israël!

Oh, v'nez, oh v'nez, oh Sinne dé Jeu!
Oh v'nez et êcliaithiz-nous acheteu!
Cachiz les néthes nues d'la niet
Et touos les ombres tchi nouos êffraient.
Tchi jouaie! Tchi jouaie!
Emmanuel
Est né pour té,
Oh Israël!

Oh, v'nez, oh v'nez, Réchinne d'Isaï!
Dé d'ssous les pids d'la tyrannie,
Et des terreurs d'la fôsse et d'l'enfé
Saûvez tan peupl'ye et m'nez-les.
Tchi jouaie! Tchi jouaie!
Emmanuel
Est né pour té,
Oh Israël!

Oh, v'nez, oh v'nez, Êtèrnel Dgieu,
La majesté et glouaithe des cieux!
À Sinaï, sus l'saint coupé,
Tu donnis à tan peupl'ye tes louais.
Tchi jouaie! Tchi jouaie!
Emmanuel
Est né pour té,
Oh Israël!

O come, o come, Emmanuel

J'vos souhaitons un jouaiyeux Noué

J'vos souhaitons un jouaiyeux Noué-é,
J'vos souhaitons un jouaiyeux Noué-é,
J'vos souhaitons un jouaiyeux Noué-é,
Et eune heûtheuse année!
Jé chantons ichîn
Pouor touos nos anmîns,
J'vos souhaitons un jouaiyeux Noué-é,
Et eune heûtheuse année!

Et j'aim'thons mangi du podîn
Et j'aim'thons mangi du podîn
Et j'aim'thons mangi du podîn
Faut nos en donner!
Jé chantons ichîn
Pouor touos nos anmîns,
J'vos souhaitons un jouaiyeux Noué-é,
Et eune heûtheuse année!

We wish you a merry Christmas

Oh tchi douoche niet

Oh tchi douoche niet! oh tchi sainte niet!
Tout est calme, tout est bé.
Viy'ous la Méthe Vièrge dévânt
San pétit, chu Saint Êfant?
Dors en paix céleste,
Dors en paix céleste!

Oh tchi douoche niet! oh tchi sainte niet!
Rouais et bèrgers veinnent Lé vaie.
L'air est pliein dé cantiques jouaiyeux
Chantés par les anges ès cieux:
Christ, not' Saûveux est né,
Christ, not' Saûveux est né!

Oh tchi douoche niet! oh tchi sainte niet!
Tout est calme, tout sé tait.
Viy'-ous ch't Êfant adouothabl'ye
Couochi dans eune pouôrre êtabl'ye?
Ch'est lé Fis dé Dgieu,
Ch'est lé Fis dé Dgieu!

Oh tchi douoche niet! oh tchi sainte niet!
L'êtaile lit, tout est cliai.
L'Êfant dort en paix et souôrit.
J'trouv'thons not' salut en Li:
Christ au monde est donné,
Christ au monde est donné!

Lé housse et lé hierru

Lé bieu housse et lé hierru
Quand i' sont touos bein crus,
Dé-é touos les bouais tchi sont d'la forêt
Ch'est l'housse qué j'aimons l'mus.

*Lé solé l'vant lé matin,
La vague, l'âne et lé boeu,
Les-es chansons d'Noué jouées sus l'orgue,
La-a belle chant'tie du tchoeu!*

Lé housse, i' craît des rouoges pommes
Tchi sont bein amièrties,
E-et Marie fit naître Jêsu
Tchi-i nos donnit sa vie.

*Lé solé l'vant lé matin,
La vague, l'âne et lé boeu,
Les-es chansons d'Noué jouées sus l'orgue,
La-a belle chant'tie du tchoeu!*

Lé housse, i' craît eune p'tite flieur
Tchi est blianche comme la né
E-et Marie fit naître Jêsû
Pou-our sauver té et mé

*Lé solé l'vant lé matin,
La vague, l'âne et lé boeu,
Les-es chansons d'Noué jouées sus l'orgue,
La-a belle chant'tie du tchoeu!*

Lé housse, il a des pitchets
I' faut qué j'prannons soin,
E-et Marie fit naître Jêsû
Lé jour dé Noué, l'matin.

*Lé solé l'vant lé matin,
La vague, l'âne et lé boeu,
Les-es chansons d'Noué jouées sus l'orgue,
La-a belle chant'tie du tchoeu!*

Qué Dgieu vos garde heuteurs, bouannes gens

Qué Dgieu vos garde heuteurs, bouannes gens,
I' faut bein célébrer!

Vous souv'n'-ous qué Christ, not' Saûveux,
Fut né, chute fête dé Noué,
À seule fin d'nos saûver du dgiâbl'ye,
Pardonner nos péchés?

*Tchi nouvelles dé bonheu et jouaie,
Bonheu et jouaie,
Tchi nouvelles dé bonheu et jouaie!*

Et Dgieu, not' Péthe, envyit un ange
Tch'appathut dans lé ciel,
Et r'contit à cèrains bèrgers
Chutte mèrveilleuse nouvelle:
Qué dans la ville dé Bethléhem
Fut née eune vraie mèrvelle.

*Tchi nouvelles dé bonheu et jouaie,
Bonheu et jouaie,
Tchi nouvelles dé bonheu et jouaie!*

Les bèrgers ouîtent les mots dé l'ange,
Tchi les remplyîtent d'esprit.
I' laïssîtent trantchil'yes dans les clios
Lus troupieaux dé brébis,
Et i' trouvîtent à Bethléhem
Lé Fis dé Dgieu couochi.
Tchi nouvelles dé bonheu et jouaie,
Bonheu et jouaie,
Tchi nouvelles dé bonheu et jouaie!

Bouannes gens, au Seigneu chantez bein!
Vous, Madanme! Vous, Moussieu!
Et embraichiz la compangnie,
Châque anmîn, fréthe et soeu!
Ch'est la belle fête jouaiyeuse dé Noué
Qué j'célébrons achteu.
Tchi nouvelles dé bonheu et jouaie,
Bonheu et jouaie,
Tchi nouvelles dé bonheu et jouaie!

God rest you merry gentlemen

Parmi la g'lée d'hivé

Parmi la g'lée d'hivé
I' ventait si froid.
L'ieau coumme d'la pièrre semblaït,
La tèrre coumme du fé.
I' tchiyait d'la né sus né,
Né sus né.
Parmi la g'lée d'hivé
Y'a bein des années.

Ni chu monde ni l'Paradis
N'est trop humbl'ye pouor Li.
Dgieu aime tant l'monde entchi
Qu'I' donnit San Fis.
Parmi la g'lée d'hivé,
L'ètabl'ye 'tait assez
Pouor not' Dgieu, Rouai des Rouais -
Chu p'tit saint bébé.

Tch'est qué j'peurs Lî donner,
Eune pouôrre âme coumme mé?
Si j'tais iun des bèrgers,
J'donn'nais un angné.
Si j'tais iun des Trais Rouais,
Jé Lî f'thais honneu.
Tout chein qué j'peurs donner,
Jé Lî donne - man tchoeu.

In the bleak midwinter

O Arbre dé Noué

O Arbre dé Noué! O Arbre dé Noué!
Tes fielles sont tréjous auve mé.
O Arbre dé Noué! O Arbre dé Noué!
Tes fielles sont tréjous auve mé.
I' sont belles et vèrtes en Êté
Et acouo quand i' tchait d'la né.
O Arbre dé Noué! O Arbre dé Noué!
Tes fielles sont tréjous auve mé.

O Arbre dé Noué! O Arbre dé Noué!
Tchi bonheu dans ta bieauté!
O Arbre dé Noué! O Arbre dé Noué!
Tchi bonheu dans ta bieauté!
Tu'es tréjous à nos faithe penser
À la niet quand Jêsû fut né.
O Arbre dé Noué! O Arbre dé Noué!
Tchi bonheu dans ta bieauté!

O Arbre dé Noué! O Arbre dé Noué!
Ta forche est coumme San pouvé.
O Arbre dé Noué! O Arbre dé Noué!
Ta forche est coumme San pouvé.
Il enduthe à l'ètèrnité
Craïssant en amour et espé.
O Arbre dé Noué! O Arbre dé Noué!
Ta forche est coumme San pouvé.

Lé preunmié Noué

Lé preunmié Noué qué l'ange annoncit
'Tait à certains pouôrrs bèrgers ès clios couochis,
Ès clios couochis, gardant lus brébis
Par eune fraide niet d'hivé tch'était approfondie.
Noué, Noué, Noué, Noué,
Noué, Noué, Noué, Noué,
Achteu lé Rouai d'Israël est né!

I' vîtent dans l'ciel eune grande étaile
Et sus chu monde, la lueu 'tait belle.
Dé liain ou v'nait, dé l'êst ou lithait
Et la glouaithe continuait jour et niet.
Noué, Noué, Noué, Noué,
Noué, Noué, Noué, Noué,
Achteu lé Rouai d'Israël est né!

Et par la lueu d'l'êtaile tchi lithait
Trais Mages dé difféthents pays vénaient.
Lus întention 'tait d'chèrchi un rouai
Et d'siéthe l'êtaile là où'est qu'ouille allait.
Noué, Noué, Noué, Noué,
Noué, Noué, Noué, Noué,
Achteu lé Rouai d'Israël est né!

L'êtaile s'appaichit du nord-vouêt
Et à Bethléhem apportit grande jouaie,
Et là ou s'arrêtit et restit
Là où'est qué not' Jêsû Christ 'tait couochi.
Noué, Noué, Noué, Noué,
Noué, Noué, Noué, Noué,
Achteu lé Rouai d'Israël est né!

Ideo Gloria in Excelsis Deo

Lé monde a ouï aniet
Les cantiques et les vouaix
D's êfants tchi chantent dé jouaie,
Car not' Saûveux fut né
Par lé Bouan Dgieu donné:
Ideo-o-o, Ideo-o-o, Ideo Gloria in Excelsis Deo

Dans chu monde I' fut né,
Dans du langeu fretté,
Dans un tro, I' dormait
Auve les bêtes dé l'êtabl'ye,
Hors lé pouver du dgiâbl'ye:
Ideo-o-o, Ideo-o-o, Ideo Gloria in Excelsis Deo

Les trais Mages y vénaient,
Chèrchant pouor chu Bébé,
Chèrchant pouor chu Bébé.
L'êtaile les attithait
Pouor lé P'tit admither:
Ideo-o-o, Ideo-o-o, Ideo Gloria in Excelsis Deo

Les minnistres et les gens,
Auve les anges et l's êfants,
Chantons tous lé même chant:
Dans chu monde Tu d'cendis,
I' nos faut Té louangi!
Ideo-o-o, Ideo-o-o, Ideo Gloria in Excelsis Deo

Personent hodie

Anges des régions dé la glouaithe

Anges des régions dé la glouaithe,
Pâsez par-'chîn à ces sé.
Ou racontez toute l'histouaithe
Coumment not' Saûveux est né.
Gloria in excelsis Deo!

Dans les clios i' y'a des bèrgers,
Châtchun gardant san troupé.
Dgieu ès hoummes est v'nu démeuther;
Adouothons chu saint bébé.
Gloria in excelsis Deo!

Mages, laïssiz vos contempliâtons;
Y'a dé pus grande împortance.
Chèrchiz don lé d'si des nâtions;
L'êtaile annonce sa naîssance.
Gloria in excelsis Deo!

Angels from the realms of glory

Les Douze Jours dé Noué

Lé preunmié jour dé Noué
Man galant m'a donné
Un pèrdrix Saint-Ouënnais!

Lé deuxième jour dé Noué
Man galant m'a donné
Deux colombes d'Grouville,
Et un pèrdrix Saint-Ouënnais!

Lé traîsième jour dé Noué
Man galant m'a donné
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé quatrième jour dé Noué
Man galant m'a donné
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé chîntchième jour dé Noué
Man galant m'a donné
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé siêxième jour dé Noué
Man galant m'a donné
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé septchième jour dé Noué
Man galant m'a donné
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé huitchième jour dé Noué
Man galant m'a donné
Huit vaques d'Sainte Mathie,
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé neuvième jour dé Noué
Man galant m'a donné
Neu tonmates d'Saint Saûveux,
Huipt vaques d'Sainte Mathie,
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé dgiêxième jour dé Noué
Man galant m'a donné
Dgiêx patates d'Saint Louothains,
Neu tonmates d'Saint Saûveux,
Huit vaques d'Sainte Mathie,
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé onzième jour dé Noué
Man galant m'a donné
Onze danmes d'la Trinn'té,
Dgiêx patates d'Saint Louothains,
Neu tonmates d'Saint Saûveux,
Huit vaques d'Sainte Mathie,
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé douzième jour dé Noué
Man galant m'a donné
Douze mèssieurs d'Saint Pierre,
Onze danmes d'la Trinn'té,
Dgiêx patates d'Saint Louothains,
Neu tonmates d'Saint Saûveux,
Huit vaques d'Sainte Mathie,
Sept cÿngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Des bèrgers gardaient lus troupieaux

Des bèrgers gardaient lus troupieaux,
Paisibliément assis,
Quand l'Ange du Seigneur décendit
Et la niet s'ècliaithit.

"I' n'faut pas craindre" I' lus dit,
"Ni vos troublier l's esprits,
Dé bouannes nouvelles jé vos apporte,
Pouor toute l'humanité"

"Pouor vous aniet à Bethléhem,
Un Saûveux vos est né;
Et chu Saûveux, ch'est Jêsû Christ,
Et ch'en est 'chîn la preuve:

L'Êfant céleste ou trouv'thez
Ilà en veue d'tout l'monde,
Et bein pouôrrement enmailloté
Dans eune crèche à dormi."

Aussitôt dit, il appathut
Dans l'ciel des anges brillants,
Qui louangeaient l'Bouan Dgieu jouaiyeusement,
En chantant auve ches mots:

"Glouaithe au Bouan Dgieu dans les lieux hauts.
Et paix sainte sus la tèrre;
Bouanne volanté envèrs les hoummes
D'achteu à tout janmais!"

While shepherds watched

Prans du housse

Prans du housse pouor décorâtion,
Fa la la la la la la la!
Ch'est lé jour dé célébrâtion,
Fa la la la la la la la!
J'veurs du vîn; donne-mé eune vèrrée,
Fa la la la la la la la!
Célébrons chutte jouaiyeuse séthée,
Fa la la la la la la la!

Y'a du pantch et y'a du podîn,
Fa la la la la la la la!
Y'a d'la gâche et y'a du chaûdé,
Fa la la la la la la la!
Chante auve mé, ensembl'ye chantons,
Fa la la la la la la la!
Baivons, mangeons, rions, dansons,
Fa la la la la la la la!

Atout jouaie dans l'temps jadis

Atout jouaie dans l'temps jadis,
L's anciens tch'étaient rêvilyis
Vîdrent là lueu d'la belle étaile
Tch'êcliaithait lé c'mîn du Ciel;
O Bouan Dgieu, donne-nous l'avis
Dé Té siéthe toute nouot' vie.

Comme i' suivîdrent la lueu
Tchi les m'nit jusqu'au Saint Lieu,
Ou'est tch'i' pûdrent lus agenouoilli,
Pour adouother l'Chièr Pétit
Tchi d'vînt pus tard lé Saûveux
Dé toutes âmes souos les Cieux.

Il' apportîdrent des présents
Dé grand' valeu, et d'l'enchens;
Ch'est à nous dé siéthe lus pas,
Et d'nouos comporter 'chîn bas,
D'manniéthe à Lî présenter
Nouot' amour et nouot' respé.

O chièr Jêsû, à chèque jour,
Veil'yes sus nous avec amour,
Et à l'heuthe du drein soupi
Èrchai-nous dans l'Paradis
Où'est tch'i' n'y'a plieurs ni mînséthes,
Dans la glouaithe dé Tan sanctuaithe.

Là, dans l'bonheu et la jouaie,
Matîn, méjeu, arlévée,
Dé Ta présence, et des anges,
J'pouôrrons T'offri nouos louanges
Et chanter l's allélûias
Auve lé Sanctus d'ichîn bas.

As with gladness men of old

Sus l'coup d'mînniet les bèrgers ouîtent

Sus l'coup d'mînniet les bèrgers ouîtent
Chu vièr chant glorieux;
Des anges qu'i' s'penchaient vèrs la tèrre,
Jouant lus harpes d'or;
"Paix sus la tèrre, bouanne volanté
Ès hoummes, du Tout Puissant"
Lé monde entchi dévînt trantchil'ye
Pour ouï lé chant des anges.

Acouothe i' veinrent travèrs les cieux,
Lus ailes païsibl'yes ouvèrtes;
Et lus musique sainte et céleste
Sonne si douoche sus la tèrre.
En d'sus ses pliaines et ses montangnes
Grâcieuses i' vont et veinrent;
Et tréjous par sus l'brit des hoummes
Les anges heutheuses chantent.

O vous, souos l'fardé dé la vie
Courbés dé vos mînséthés,
Vous qui peinez sus vot' quémîn
À pas pénibl'yes et longs;
Couothage, pour vous bonheu et jouaie
D'cendant sus d's ailes des cieux.
Èrpos'-ous don dé temps en temps
Pour ouï lé chant des anges.

V'là don! lé temps bein vite s'envole,
Coumme les prophètes disaient;
Auve châque siècl'ye nou-s-appraiche du jour
Quand touos s'sont rêunnis;
Quand j'connaîtrons la Paix suprême
En touos lieux, en touos âges,
Et qu'cieux et tèrre résonn'nont
Au chant des hoummes et anges.

It came upon the midnight clear

Dans la Cité du Rouai Dâvi

Dans la Cité du Rouai Dâvi,
Sé trouvait eune vielle établ'ye:
Où'est qu'eune méthe posit san p'tit êfant
Dans eune crèche à rempliaichi san liet.
Mathie Sainte, Méthe bénie
Et san fis, ch'est Jêsû Christ.

I' vînt du ciel sus la tèrre,
Dgieu li-même, lé Tout-Puissant.
Décendit dans eune établ'ye,
Et san bèr n'était qu'eune stâlle.
Auve les pauvres - les humbl'yes d'esprit;
S'trouvait nouot' Saûveux Jêsû Christ.

Dé nos ièrs enfin jé l'vèrrons,
Grâce à sèn immense amour.
Car ch't êfant si tendre et si doux,
Ch'est nouot' Seigneu, nouot' Sécours.
Touos ses êfants lé siéthont
Et au ciel il' arriv'thont.

Pas dans eune établ'ye pauvre
Auve les bestchiaux alentou d'li,
Jé lé vèrrons, mais en glouaithe
Assis à la drouaite dé Dgi,
Quand, couronnés, touos en blic, blanc,
Ses êfants s'assembliéthont.

Cantique du Sussex

Lés Chrêchiens chantent, chutte séthée d'Noué,
Pour ouï ches nouvelles dé grande jouaie.
Lés Chrêchiens chantent, chutte séthée d'Noué,
Pour ouï ches nouvelles dé grande jouaie.
Dans les cieus appathaïssent des anges,
Chantant, èrpétant lus louanges.

Et pouortchi qué j'devthons êt' triste,
Quand j'fêtons la naïssance du Christ?
Et pouortchi qué j'devthons êt' triste,
Quand j'fêtons la naïssance du Christ?
Quand not' Saûveux a libéthé
Les hoummes d'la prison dé péché.

La lueu nos a illeunminné
Et fit chanter les anges chutte niet,
La lueu nos a illeunminné
Et fit chanter les anges chutte niet,
"Glouaithe céleste et paix humaine
Achteu et pour tréjous. Âmen."

Sa Grâce a chassé lé péché,
Donnant la Vie et la Santé.
Sa Grâce a chassé lé péché,
Donnant la Vie et la Santé.
Hoummes et anges, chantez auve jouaie,
Pour saluer lé nouveau rouai!

Sonne les clioches

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né -

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né!

Veins-t-en avec mé,

Driéthe man bidet.

Couvre les deux d'nous,

Cauds coumme des mouossons!

J'ithons nos prom'ner

À travers d'la né.

Êcoute man p'tit j'va tchi trotte,

Lié à man traîné!

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né -

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né!

Ouai-tu la sonn'nie céleste?

Ouai-tu la sonn'nie céleste?
Les anges sonnent les clioches au ciel.
La chant'tie du Vouêt et d'l'Êst
Nos annonce la bouonne nouvelle:
Glouaithe, Hosanna ès pus hauts lieux!
Gloria, Hosanna in excelsis!

Et ichîn bas les cliochièrs
Font cârillon auve lus vouaix;
Touos les jannes et touos les vièrs
Louangent lé Seigneur auve grande jouaie:
Glouaithe, Hosanna ès pus hauts lieux!
Gloria, Hosanna in excelsis!

Êcoutons à sinne dé jeu
Les belles matinnes des sonneurs
Au sé chu cantique heutheux
Nos rempliétha dé bonheu.
Glouaithe, Hosanna ès pus hauts lieux!
Gloria, Hosanna in excelsis!

Ding-dong merrily on high

D'main

D'main est l'jour dé Noué!
Lé pus grand jour dé l'année!
Et pour qu'tout s'sait prêt,
J'veins d'aîdgi à M'mée.
J'avons décoré,
Patchi des présents.
Déhors i' gèle et fait d'la né;
Ch'n'est pas d'même par dedans!

*J'aime bein Noué! Ah, véthe-dgia!
Auve touos les cadeaux,
Apportés par Papa Noué
Dans eune grand' pouque sus san dos.
Sus man liet j'm'en vais pendre
Eune cauche qu'est toute nette,
Espéthant qué d'main matin
Ou s'sa remplyie dé belles jouettes.*

M'mée a fait l'podîn
Et eune belle grand' gâche dé Noué.
J'avons des châtaines
Pour rôti au feu,
Oranges et codrettes,
Des chucrîns étout;
Un gros picot qu'est prêt stoffé
Pour M'mée à mettre au fou.

*J'aime bein Noué! Ah, véthe-dgia!
Auve touos les cadeaux,
Apportés par Papa Noué
Dans eune grand' pouque sus san dos.
Sus man liet j'm'en vais pendre
Eune cauche qu'est toute nette,
Espéthant qué d'main matin
Ou s'sa remplyie dé belles jouettes.*

Notre bouais dans la carre
A des p'tites veues d'ssus étout,
Et l'êtaile sus l'haut
Touche presqué au pliafond!
Mais l'pus împortant
La cheunm'née fraîche nettie,
Veurt dithe qué Papa Noué peut v'nîn
Sans sali ses habits!

*J'aime bein Noué! Ah, véthe-dgia!
Auve touos les cadeaux,
Apportés par Papa Noué
Dans eune grand' pouque sus san dos.
Sus man liet j'm'en vais pendre
Eune cauche qu'est toute nette,
Espéthant qué d'main matin
Ou s'sa remplyie dé belles jouettes.*

Sus l'air dé: Jingle Bells

Jésû est né

Louangiz lé Seigneur, Jésû est né;
Car dans eune êtabl'ye l'êfant divîn
Annoncé des anges, mèrtchi d'l'êtaile;
Not' Saûveux fut né à Bethléhem!

*Chantez aue les anges, chantez d'la paix,
Qu'les cieux rétentissent d'amour et d'jouaie!
Chantez aue les anges dé not' Saûveux!
Êfant dé Marie, fis du Seigneur!*

Les mages et bèrgers agenouoillis là,
L'âne et les brébis, la biche, lé j'va,
Adorant l'êfant sus l'fain couochi,
La glouaithe du Bouan Dgieu lîsant l'tou d'li!

*Chantez aue les anges, chantez d'la paix,
Qu'les cieux rétentissent d'amour et d'jouaie!
Chantez aue les anges dé not' Saûveux!
Êfant dé Marie, fis du Seigneur!*

Bethléhem dormait, èrpos profond,
Quand l's anges apportîtent à toutes nâtions,
Nouvelle dé l'êfant; prannant sus li,
Les péchés ênormes du monde entchi.

*Chantez auve les anges, chantez d'la paix,
Qu'les cieux rétentissent d'amour et d'jouaie!
Chantez auve les anges dé not' Saûveux!
Êfant dé Marie, fis du Seigneur!*

Les anciens prophètes l'avaient prédit,
Chu sé-là l'mithacl'ye fut accompli!
Chantez vos cantiques à Dgieu aniet,
Louangiz lé Seigneur, Jêsû est né.

*Chantez auve les anges, chantez d'la paix,
Qu'les cieux rétentissent d'amour et d'jouaie!
Chantez auve les anges dé not' Saûveux!
Êfant dé Marie, fis du Seigneur!*

Sus l'air dé "Blessed Assurance Jesus is Mine.

À travers les montangnes

À travers les montangnes
Et du d'sèrt i' veinrent,
Les Mages savants et sages
À sa pouôrre humbl'ye d'meuthe
D'eune ardeur dèvouée
Dé liain il' arrivent
Pour suivre sans tchestchion
Eune étaile coumme dgide.

Là lus Rouai, lus Saûveux,
Couochi, humbl'ye et doux,
Chutte veue qui les amène
Tout du long d'lus viage,
Pour êcliaithi tréjous
Les nâtions au liain,
Suivant lé c'mîn jouaiyeux
Condis par l'étaile.

Té qui dans eune établ'ye
Au monde arrivit,
Qui achteu en glouaithe
Sus touos rouoyaumes règne,
Èrtchil'ye les pouôrrs païens
Des pays lointains
Qui n'ont janmais veu lithe
Ch't' étaile sans patheille.

En avant toute la niet,
Niet si seule et sombre,
Auve Ta sainte leunmiéthe
Lisant l'avant à ieux,
Mène-les, Juis et Paens,
Au r'pos êtèrnel,
Jannes et vièrs étout
Condis par T'n étaile.

O pétite ville dé Béthléhem

O pétite ville dé Béthléhem
Tu'es couochie trantchilement.
Lé ciel èrlit sus tan dormi
Bein silencieusement.
Mais v'là tchi r'lit dans tes sombres rues
La leunmiéthe êtèrnelle,
L'êffrai, l'espé dé châque année
Lus r'trouvent souos ches étailes.

Jésû est né d'la Vièrge Mathie!
Sus la tèrre coumme ès cieux,
Les hoummes au liet, les anges au dget,
Èrchèvent l'amour dé Dgieu.
Procliâmez, étailes du matîn,
La naïssance du Saûveux!
Chantez auve jouaie à Dgieu, not' Rouai,
Qu'Sa paix saît ouïe achteu!

Bein trantchilement, bein trantchilement,
La mèrvelle appathaît,
Lé don dé Dgieu à chèque humbl'ye tchoeu,
Lé présent dé Sa paix.
Jé n'ouïyons pon Sa tape à l'us
Siez nous, des pouôrrs pécheurs,
Mais chèque esprit tch'a fouai en Li
Èrchait l'saint vîsiteur.

O p'tit êfant dé Béthléhem,
Siez nous, Tu'es v'nu d'meuther.
Hale tout hèrtchîn, et entre ichîn:
Sai né en nous aniet.
J'ouïyons l'assemblée angélique
Tchi chante la bouonne nouvelle,
Car il est v'nu, lé p'tit Jêsû,
Not' Rouai Emmanuel!

O little town of Bethlehem

Taïs'-ous, taïs'-ous, viyiz lé p'tit êfant

Taïs'-ous, taïs'-ous, viyiz lé p'tit êfant
Tchi dort paisibliément dans chu bèr.
Oüïyiz les vouaix des anges et hoummes chantant
Là-haut dans lé Ciel et sus la Tèrre.
Car lé p'tit Jêsû
À ces sé est v'nu!
Chu pouôrre p'tit êfant est lé Bouôn Dgieu!
Car ch'est man Saûveux
Et man Rédempteux,
Né dans eune établ'ye et dans man tchoeu.

Lé boeu né beûle pon et l'âne né brait pon
À g'nouors dans lus stâlles louangeant lus Rouai.
Agenouoill'-ous étout en contempliâtion
Dé chute séthée dé mèrvelles et jouaie.
Car lé p'tit Jêsû
À ces sé est v'nu!
Chu pouôrre p'tit êfant est lé Bouôn Dgieu!
Car ch'est man Saûveux
Et man Rédempteux,
Né dans eune établ'ye et dans man tchoeu.

D'valés des clios, y'a des gardeurs d'brébis.
Des Mages ont apporté lus présents.
Humbliément offrons, auve l'esprit rêjouï,
Au p'tchiot nos louanges tchi montent coumme
l'enchens.
Car lé p'tit Jêsu
À ces sé est v'nu!
Chu pouôrre p'tit êfant est lé Bouôn Dgieu!
Car ch'est man Saûveux
Et man Rédempteux,
Né dans eune établ'ye et dans man tchoeu.

Étaile du ciel

Lé jour dé Noué
En gardant lus brébis,
Les bèrgers vîtent dans l'ciel
Un Ange tchi lus dit,
"Suivez tous l'étaile,
À Bethléhem,
Et là-bas, ou trouv'thez
Un nouvieu né."

*Étaile du ciel,
Si mangnifique et si brillante,
Tchi mouontre lé c'mîn
Jusqu'à l'établ'ye
Où'est qu'est chu p'tit êfant.
Chantez fidèles, dé tout bouan tchoeu,
Pouor vot' Seigneur, lé Fis du Bouan Dgieu.*

Les Mages dé l'Êst
Tchi traversaient la mielle,
En r'gardant vèrs lé ciel,
Vîtent étout l'étaile
Et en la suivant
À Bethléhem
Y trouvîtent dans l'établ'ye
Lé p'tit êfant.

*Êtaile du ciel,
Si mangnifique et si brillante,
Tchi mouontre lé c'mîn
Jusqu'à l'êtabl'ye
Où'est qu'est chu p'tit êfant.
Chantez fidèles, dé tout bouan tchoeu,
Pouor vot' Seigneur, lé Fis du Bouan Dgieu.*

Les riches et pauvres,
Tout l'monde sé rêjouissant,
Vîntent mett' au pid d'la crèche,
Un tas d'bieau présents.
Et ses pathents,
Èrconnaissant
Qué lus fis 'tait l'beinv'nu
À Bethléhem.

*Êtaile du ciel,
Si mangnifique et si brillante,
Tchi mouontre lé c'mîn
Jusqu'à l'êtabl'ye
Où'est qu'est chu p'tit êfant.
Chantez fidèles, dé tout bouan tchoeu,
Pouor vot' Seigneur, lé Fis du Bouan Dgieu.*

Chantons sans cêsse,
Et chantons nos louanges,
Pouor lé Seigneur Jêsû,
Tch'est lé Rouai des Anges.
Et par sa naïssance
À Bethléhem
I' nos donne jouaie du ciel,
Paix sus la tèrre.

*Êtaile du ciel,
Si mangnifique et si brillante,
Tchi mouontre lé c'mîn
Jusqu'à l'établ'ye
Où'est qu'est chu p'tit êfant.
Chantez fidèles, dé tout bouan tchoeu,
Pouor vot' Seigneur, lé Fis du Bouan Dgieu.*

Sus l'air Sagina

Rudolf lé chère au rouge nez

Rudolf lé chère au rouge nez
Avait l'nez bein rouge et long
Et si ou l'viyez achteu
Ou direz bein tchi 'n a deux d'gouts!

Touos les autres pétits chères
Soulaient rithe et en faithe du fanne -
I' n'laïssaient pas pouôrre Rudolf
Jouer aue ieux et jouer lus gammes.

Mais eune belle sèrvelle dé Noué
Papa Noué vînt en disant
"Rudolf au nez rouge et bé -
Vens m'aîdgi aue les présents"

Achteu touos les chères l'aiment bein,
Et touos ieux lus mettent à braithe:
"Rudolf, lé chère au rouge nez
Ch'est qu'tu fais eune belle histouaithe!"

Rudolf the red-nosed reindeer

Lé Fis d'Marie

Y'a bein longtemps à Bethléem,
d'après chein qu'la Bibl'ye nos dit,
lé fis d'Marie, Jêsû Christ,
fut né lé jour dé Noué.

Êcoutez les Anges qui chantent,
Un nouvieu Roué est né.
Et l'homme vivra êternellement
à cause du jour dé Noué.
Trompettes sonnent et les Anges chantent,
Êcoutez chein qu'i' dîsent:
Qué l'homme vivra êternellement
à cause du jour dé Noué.

Gardant lus troupieaux à l'ouvèrt,
Les bèrgers ouîtent un chant au liain,
Vîtent eune étaile parfaite
Qui brillait dans lé ciel si bein.
Et Joseph et sa femme Marie
Vîtent à Bethléem chute niet,
Et n'pûtent pas trouver même eune chambre
Où'est qu'l'êfant pouvait être né.

Êcoutez les Anges qui chantent,
Un nouvieu Roué est né.
Et l'homme vivra ètèrnellement
à cause du jour dé Noué.
Trompettes sonnent et les Anges chantent,
Êcoutez chein qu'i' dîsent:
Qué l'homme vivra ètèrnellement
à cause du jour dé Noué.

Bétôt i' trouvîtent un p'tit coin,
Et là, dans eune établ'ye sombre,
Avec les bêtes pour compangnie,
Jésû fut né au monde.
Y'a bein longtemps à Bethléem,
D'après chein qu'la Bibl'ye nos dit,
Lé fis dé Marie, Jésû Christ,
Fut né lé jour dé Noué.

Êcoutez les Anges qui chantent,
Un nouvieu Roué est né.
Et l'homme vivra ètèrnellement
à cause du jour dé Noué.
Trompettes sonnent et les Anges chantent,
Êcoutez chein qu'i' dîsent:
Qué l'homme vivra ètèrnellement
à cause du jour dé Noué.

J'sommes trais Mages

Dé bein au liaïn j'avons viagi.
J'sommes trais Mages, des rouais dé magie.
Par la campagne et les montangnes
Souotre eune étaile tchi lit.

Oh tchi belle étaile dans les cieux!
Tchi nos dgid'da coumme eune veue
Canté les Rouais, tréjous vèrs l'Vouêt,
Condi-nous au Fis dé Dgieu!

J'ai dé l'or à lî présenter;
J'allons lé couronner dèrché -
Chu p'tit êfant tchi bein pouôrrement
Dans eune établ'ye fut né.

Oh tchi belle étaile dans les cieux!
Tchi nos dgid'da coumme eune veue
Canté les Rouais, tréjous vèrs l'Vouêt,
Condi-nous au Fis dé Dgieu!

J'ai dé l'enchens dé tchi l'odeu
monte aue nos priéthes au Bouôn Dgieu;
Contempliâtion, adouothâtion,
et louanges ès pus hauts lieux.

Oh tchi belle étaile dans les cieux!
Tchi nos dgid'da coumme eune veue
Canté les Rouais, tréjous vèrs l'Vouêt,
Condi-nous au Fis dé Dgieu!

J'ai d'la myrrhe, tch'est forte et améthe
Et tchi l'enfliub'tha coumme un suaithé;
Souffrant, plieuthant, sangnant, mouothant,
parfunmé du chînm'tchiéthe.

Oh tchi belle étaile dans les cieux!
Tchi nos dgid'da coumme eune veue
Canté les Rouais, tréjous vèrs l'Vouêt,
Condi-nous au Fis dé Dgieu!

Dé bein au liain j'avons viagi.
J'sommes trais Mages, des rouais dé magie.
Par la campangne et les montangnes
Souotre eune étaile tchi lit.

Oh tchi belle étaile dans les cieux!
Tchi nos dgid'da coumme eune veue
Canté les Rouais, tréjous vèrs l'Vouêt,
Condi-nous au Fis dé Dgieu!

Béthléhem chante à ces sé


Ouai lé bêlement d'brébis sus les côtis!
Ouai lé chant des anges ès cieux!
Coumme les anges et angnieaux sont à louangi:
"Glouaithe à Dgieu ès pus hauts lieux!"
D'eune vouaix d'ange et d'eune vouaix d'agné
Béthléhem lî chante à ces sé.
Ouai la réponse des gardeurs dé brébis!
Ouai lus êcatchîn jouaiyeux!

Sié les gardeurs d'brébis dé d'dans les clios!
Sié lus pas avaû les c'mîns!
Coumme il' apportent un agné sus lus dos,
y'a un agné tch'est à v'nîn.
D'eune vouaix d'ange et d'eune vouaix d'agné
Béthléhem lî chante à ces sé.
Sié-les jusqu'ès bords du bèr au moussethot!
Sié-lé tréjous à l'av'nîn!

Vai la ville où'est qu'lé saint p'tchiot est bèrchi!
 Vai l'êtabl'ye où'est qu'i' fut né!
 Coumme l'âne et l'boeu sont à lus agenouoilli,
 il est v'nu pouor nos saûver.
 D'eune vouaix d'ange et d'eune vouaix d'angné
 Béthléhem lî chante à ces sé.
 Vai-lé acanté Joseph et Mathie!
 Vai not' Saûveux, not' espé!

Sai heutheux en apportant tes présents!
 Sai fidèle et génétheux
 Coumme les rouais aue la myrrhe, l'or et l'enchens,
 offre-lî tréjous du miyeu!
 D'eune vouaix d'ange et d'eune vouaix d'angné
 Béthléhem lî chante à ces sé.
 Sai tréjous not' trésor, oh saint êfant!
 Sai tréjous siez nous dans l'tchoeu!

Air: Cantique 95, Recueil de Cantiques Méthodiste, 1889



Dans la vielle ville du Rouai Dâvi

Oüïyons auve les gardeurs d'brébis
les cantiques des anges ès cieux!
Allons, acanté ieux, vilyi
sus l'êfant tch'est l'Fis dé Dgieu!

*Dans la vielle ville du Rouai Dâvi
y'a eune lueu tch'êcliaithe la niet;
eune êtînhelle dé fouai satchie
dans not' tchoeu, chutte séthée d'Noué.*

Viyons endormi dans l'fêtu,
êcliaithi par eune sainte lueu,
né dans l'êtabl'ye, lé p'tit Jêsu
tch'est bèrchi siez l'âne et l'boeu.

*Dans la vielle ville du Rouai Dâvi
y'a eune lueu tch'êcliaithe la niet;
eune êtînhelle dé fouai satchie
dans not' tchoeu, chutte séthée d'Noué.*

Les Trais Mages ont r'mèrtchi l'êtaile;
i' l'ont r'connu, i' l'ont sieu.
Séyons sages et tréjous fidèles,
siêthant l'êtaile au Saûveux!

*Dans la vielle ville du Rouai Dâvi
y'a eune lueu tch'êcliaithe la niet;
eune êtîncelle dé fouai satchie
dans not' tchoeu, chutte séthée d'Noué.*

Jour dé paix et d'célébrâtion,
jour dé jouaie et dé bonheu!
Lé Bouôn Dgieu êcliaithe les nâtions,
et j'viyons not' Rédempteu!

*Dans la vielle ville du Rouai Dâvi
y'a eune lueu tch'êcliaithe la niet;
eune êtîncelle dé fouai satchie
dans not' tchoeu, chutte séthée d'Noué.*

Air: Cantique 73, Recueil de Cantiques Méthodiste, 1889



Étailes, étailes

À Béthléhem, les gardeurs dgettent lus brébis
sus les côtis, dans la niet si fraide et nêthe.
Mais eune étaile lit sus la ville dé Dâvi,
et v'là tchi d'vale sus ieux la lueu d'la glouaithe.
Êtailes, étailes, si cliaithes dans la niet;
Êtailes, étailes, êcliaithiz not' Noué!

Un tchoeu céleste a êgalué la séthée;
toutes les étailes auve eune constellation d'anges.
Coumme il' êrlithent, la mélodie êtailée
pét'il'ye à haut pouor înspitcher nos louanges.
Êtailes, étailes, si cliaithes dans la niet;
Êtailes, étailes, êcliaithiz not' Noué!

Sus lus chanmeaux, ava et amont les mielles
souotre un m'sagi d'là-haut l'avant à lus iêrs.
Viageant tréjous à la siette d'eune grand' étaile,
né v'là les Mages tchi veinnent, crouaïsant lé d'sêrt.
Êtailes, étailes, si cliaithes dans la niet;
Êtailes, étailes, êcliaithiz not' Noué!

Par sus la ville, eune étaile est à mèrtchi
qu'à Béthléhem un Saûveux nous est donné.
Y'a dans l'êtabl'ye dans tchi l'êfant est bèrchi
d'l'enchens, d'la myrrhe, et d'l'or tchi lit si bé.
Êtailes, étailes, si cliaithes dans la niet;
Êtailes, étailes, êcliaithiz not' Noué!

Air: Cantique 86, Recueil de Cantiques Méthodiste, 1889



Man tambour

Vein, i' m'dîtent, vaie, pa-rum pa pum pum,
Lé Rouai qui veint dé naitre, pa-rum pa pum pum
Tout lé miyeu qu'j'avons, pa-rum pa pum pum,
A Li faut qu'j'lé portons, pa-rum pa pum pum rum pa
pum pum rum pa pum pum
Car j'Lé louangeons, pa-rum pa pum pum,
Au d'ssus d'tout.

Pétit Jêsû, pa-rum pa pum pum,
Jé n'sis qu'un pouôrre garçon, pa-rum pa pum pum,
J'n'ai rein qué j'peux T'donner, pa-rum pa pum pum,
Qu'est dîngne pour un Rouai, pa-rum pa pum pum
rum pa pum pum rum pa pum pum,
Dé même j'jouerrai pour Té, pa-rum pa pum pum,
Man tambour.

Marie souôrit, pa-rum pa pum pum
L'agné et l'âne étout, pa-rum pa pum pum,
Jé fis man mus pour Li, pa-rum pa pum pum,
J'jouis man tambour pour Li, pa-rum pa pum pum
rum pa pum pum rum pa pum pum,
Et pis I' m'souôrit, pa-rum pa pum pum
Lé P'tit Jêsû.

Dors saint êfant

Les gardeurs vil'yent sus lus brébis;
et l's étailes lithent sus les clios.
Eune méthe èrgarde san p'tit êfant;
et l'péthe graie san liet dans l'tro.

*Dors saint êfant;
dors trantchil'yement
dans tan bèr siez l'âne et l'boeu.
Dors p'tit Jêsû;
tu'es not' salut:
Not' angné s'sa not' gardeux.*

Les gardeurs ouaient sus les montangnes
un tchoeu chantant dans les cieux
d'un mousse né dans eune pouôrre établ'ye:
lé p'tchiot tch'est lé Fis dé Dgieu.

*Dors saint êfant;
dors trantchil'yement
dans tan bèr siez l'âne et l'boeu.
Dors p'tit Jêsû;
tu'es not' salut:
Not' angné s'sa not' gardeux.*

Les gardeurs, laïssant lus troupieaux,
d'valant la raide caramiéthe
lus agenouôlent l'avant à l'êfant,
êcliaithis par sa sainte glouaithe.

*Dors saint êfant;
dors trantchil'yement
dans tan bèr siez l'âne et l'boeu.
Dors p'tit Jêsû;
tu'es not' salut:
Not' angné s'sa not' gardeux.*

Les gardeurs, rêjouis d'la mèrvelle,
ont siévi les vouaix ès anges.
Chantons étout au p'tit Saûveux,
lé bèrchant atout nos louanges.

*Dors saint êfant;
dors trantchil'yement
dans tan bèr siez l'âne et l'boeu.
Dors p'tit Jêsû;
tu'es not' salut:
Not' angné s'sa not' gardeux.*

Air: Cantique 69, Recueil de Cantiques Méthodiste, 1889



I' tchait d'la né

I' tchait d'la né
et Bethléhem est bein gliaichi
mais i' fait bé
dans l'bèr où'est qu'l'êfant est pliaichi.

*Dans la né,
p'tit avé;
dors en paix
toute la niet.
Dors en paix
toute la niet,
p'tit avé
dans la né.*

I' tchait d'la né
ès clios où'est qu'des gardeurs d'brébis
êmèrvilyis
ont ouï l'ange du Seigneu prêchi.

*Dans la né,
p'tit avé;
dors en paix
toute la niet.
Dors en paix
toute la niet,
p'tit avé
dans la né.*

I' tchait d'la né;
des rouais sont à lus appréchi
auve lus présents
pouor lé p'tchiot si précieux et chi.

*Dans la né,
p'tit avé;
dors en paix
toute la niet.
Dors en paix
toute la niet,
p'tit avé
dans la né.*

Air: Cantique 117, Recueil de Cantiques Méthodiste, 1889



Rêjouiss'-ous tous!

Rêjouiss'-ous tous! Né v'chîn l'Seigneu!
Les anges lé chantent dans l'air:
Glouaithe sait à Dgieu dans l'haut des cieux
Et paix sainte sus la tèrre.

Rêjouiss'-ous tous! I' règne à haut!
Chantez dans touos les pays!
Qu'les monts et grèves, les prés et ieaux
Érpètent lus chants dé jouaie!

Qu'lé nièr péché né craîsse pus d'aut'
Ni sèrcl'yes né craîssent ès clios!
I' nos lav'tha dé toutes nos fautes
Pouor dgéthi touos nos maux.

I' règne en grâce et véthité
Sus tous, et riches et pouôrrés,
En offrant à l'humanité
Les mèrvelles dé S'n amour.

Paradis d'hivé

Les clioches sonnent – les entend'-ous?
Dans les clios près d'siez-nous
Tout couvèrts dé né –
Nou dit qu'ch'est bé
Dé marchi dans not' paradis d'hivé.

Bein au liain sont les héthondes,
Liain dé chu nouveau bbianc monde.
Jé dithons ensembl'ye,
Jé rithons ensembl'ye
Ichîn dans not' paradis d'hivé.

Dans not' gardîn, j'allons faithe un bouanhomme
Dé né auve ses deux ièrs dé tchèrbon.
I' s'en va nos d'mander où'est qué j'allons,
Et j'allons dithe “Autchun bord” tout ensembl'ye.

Bein pus tard, touos êssouffliés
Et assis près d'la fouée
À nos caûffer les dés,
J'dithons en jouaie
Qu' j'avons un vrai paradis d'hivé.

Jé vai les vailes dé trais batchieaux

Jé vai les vailes dé trais batchieaux,
Chutte fête dé Noué, chutte fête dé Noué,
Jé vai les vailes dé trais batchieaux,
Chutte fête dé Noué, lé matin.

Et tch'est qu'i' y'a dans ches batchieaux,
Chutte fête dé Noué, chutte fête dé Noué?
Et tch'est qu'i' y'a dans ches batchieaux,
Chutte fête dé Noué, lé matin?

Jésû, not' Sauveur et sa Danme,
Chutte fête dé Noué, chutte fête dé Noué,
Jésû, not' Sauveur et sa Danme,
Chutte fête dé Noué, lé matin.

Et iou qu'i' vont, ches trais batchieaux,
Chutte fête dé Noué, chutte fête dé Noué?
Et iou qu'i' vont, ches trais batchieaux,
Chutte fête dé Noué, lé matin?

O i' s'en vont à Bethlehem,
Chutte fête dé Noué, chutte fête dé Noué.
O i' s'en vont à Bethlehem,
Chutte fête dé Noué, lé matin.

Et toutes les clioches, i' vont sonner,
Chutte fête dé Noué, chutte fête dé Noué,
Et toutes les clioches s'en vont sonner,
Chutte fête dé Noué, lé matin.

Et tous les anges, s'en vont chanter,
Chutte fête dé Noué, chutte fête dé Noué
Et tous les anges, s'en vont chanter,
Chutte fête dé Noué, lé matin.

J'allons chanter, j'allons chanter,
Chutte fête dé Noué, chutte fête dé Noué,
J'allons chanter, j'allons chanter,
Chutte fête dé Noué, lé matin.

Ouïy'-ous la chanson dé jouaie?

Ouïy'-ous la chanson dé jouaie?

“Christ est né, lé Rouai des Rouais!

Dans la paix, séyiz heutheurs!

Dgieu a saûvé les pécheurs!”

Lév'-ous, les nâtions d'la Tèrre,

Chantez auve tout l'Unnivèrs;

La natuthe a procliâmé:

“Lé Seigneu est né aniet!”

La natuthe a procliâmé:

“Lé Seigneu est né aniet!”

Christ, adouothé dans les cieux,

Jésû Christ est not' Seigneu.

Viyiz dans l'êtabl'ye bèrchi

L'êfant dé la Vièrge Mathie!

Adouothons à tout janmais

Dgieu habilyi dans la chai

Tch'appathaît coumme nous siez nous,

Not' Emmanuel, not' Jésus!

Tch'appathaît coumme nous siez nous,

Not' Emmanuel, not' Jésus!

Adouothons lé Prînce d'la Paix,
Tch'apporte la Vie et la Jouaie,
La Justice et la Santé:
Not' Seigneu èrssuscité!
Toute sa glouaithe il a laïssi;
Nou n'étha pus peux d'mouothi;
Il est né pouor nos êl'ver,
Pouor qué j'séyons nés dèrché.
Il est né pouor nos êl'ver,
Pouor qué j'séyons nés dèrché.

Lé D'si des Nâtions est v'nu
Pouor nos offri san Salut.
Prend ta victouaithe, Fis d'Mathie,
Sus l'Dgiâbl'ye et san mauvaîtchi.
Fai-nous saver tan pouvé
En saûvant l'monde ruinné;
Tout s'sa rêunni aniet:
Té en nous et nous en té.
Tout s'sa rêunni aniet:
Té en nous et nous en té.

Hark the Herald Angels sing

Pétite âne

Pétite âne, pétite âne,
Sus lé c'mîn pons'leux,
Continnue à marchi l'avant
Auve tan viage précieux;
Y'a bein longtemps qué tu piétounne
Dans la niet si g'lif,
N'perd pas couothage, car tu s'sas à
Bethléem tout d'suite.

Sounnez vos clioches chute niet,
Bethléem, Bethléem,
Suiviz l'étaile chute niet,
Bethléem, Bethléem;
Pétite âne, pétite âne,
Tchi fort jour pour té,
Pétite âne, porte Marie
Saufe sus san c'mîn.

Pétite âne, pétite âne,
Té v'là quâsi là,
Né hésite pas pour un îstant,
L'êtaile l'avant va;
À eune établ'ye, ma p'tite âne,
Ou s'n va t'dgider,
Car dans chute pliaiche s'en va naître
Lé fis du Bouân Dgieu.

Sounnez vos clioches chute niet,
Bethléem, Bethléem,
Suiviz l'êtaile chute niet,
Bethléem, Bethléem;
Pétite âne, pétite âne,
Tchi fort jour pour té,
Pétite âne, porte Marie
Saufe sus san c'mîn.

Habil'-ous don!

Anges ès étailes,
brîngiz vos ailes!
M'ttez vos robes d'or et d'argent!
M'ttez vos charmes, et
dans vot' armée
v'nez en glorieux habilement!

Habil'-ous don!
Attînt'-ous don!
M'ttez vot' Dînmanche, faites d'vot' tchian!
Laine, souaie, coton,
ou chiquetaillons,
chang'-ous pouor lé Saint éfant!

M'ttez vos corsets
d'oeuvre! Vot' troupé
restétha sus les côtis.
D'valez là-bas;
i' vos caûff'tha,
dans sa glouaithé, gardeurs d'brébis!

Habil'-ous don!
Attînt'-ous don!
M'ttez vot' Dînmanche, faites d'vot' tchian!
Laine, souaie, coton,
ou chiquetaillons,
chang'-ous pouor lé Saint éfant!

M'ttez vos mantchieaux
riches et rouoyaux!
Mâges, griy'-ous! Viagiz au Vouêt!
Bein dêliêment
auve vos présents,
souotre l'étaile tchi mouontre la vouaie.

Habil'-ous don!
Attînt'-ous don!
M'ttez vot' Dînmanche, faites d'vot' tchian!
Laine, souaie, coton,
ou chiquetaillons,
chang'-ous pouor lé Saint éfant!

Joseph, té v'là!
Tchil abrias!
Toutes tes hardes touoillies du c'mîn!
Bouôn tchèrpentchi,
tu'as bein viagi.
Y'étha d'pus belles robes à v'nîn.

Habil'-ous don!
Attînt'-ous don!
M'ttez vot' Dînmanche, faites d'vot' tchian!
Laine, souaie, coton,
ou chiquetaillons,
chang'-ous pouor lé Saint éfant!

Méthe dé Jêsû,
dans tan fro d'bliu,
tendrément tu vil'ye sus li;
tan fis fretté,
acanté té -
chu p'tit êfant est l'Bouôn Dgi.

Habil'-ous don!

Attînt'-ous don!

M'ttez vot' Dînmanche, faites d'vot' tchian!

Laine, souaie, coton,

ou chiquetaillons,

chang'-ous pouor lé Saint êfant!

Air: Cantique 113, Recueil de Cantiques Méthodiste, 1889



J'ouïs les belles clioches du Jour dé Noué

J'ouïs les belles clioches du Jour dé Noué
sonner l'vièr chant du temps pâssé.
Ches bouôns vièrs mots èrsonnent acouo:
" Paix sus la tèrre, bonheu ès gens".

Et j'pensis coumme, à sinne dé jeu,
touos les cliochièrs du monde d'achteu
sonnent lus doux m'sage d'avaû les âges:
" Paix sus la tèrre, bonheu ès gens".

Et l'tou du monde, n'y'a rein d'nouvé
ichîn souos l'touannement du solé -
chu vièr cantique janmais n'èrsique:
" Paix sus la tèrre, bonheu ès gens".

Mais au m'sespé, j'fis un soupi.
"Sus la tèrre n'y'a pon d'paix," qué j'dis.
"Lé ma pitchit au pilôsi
'Paix sus la tèrre, bonheu ès gens".

Épis les clioches sonnîdrent pus hautes:
"Dgieu n'est pon mort, nitout I' n'haûte.
L'Malîn pèdrà; lé Bouôn l'saitha:
'Paix sus la tèrre, bonheu ès gens".

I heard the bells on Christmas Day

Jésû Christ lé bieu pommyi

Mén âme a veu lé bouais d'la vie
tch'est tréjous vèrt et chèrgi d'frit.
Mén âme a veu lé bouais d'la vie
tch'est tréjous vèrt et chèrgi d'frit.
Ch'est l'pus bel arb' dans la bouaîs'sie,
tch'est Jésû Christ lé bieu pommyi.

J'n'ai janmais veu dé tchi si bé.
Dans man tchoeu la fouai est pliantée.
J'n'ai janmais veu dé tchi si bé.
Dans man tchoeu la fouai est pliantée.
Et j'vai achteu la glouaithe tchi lit
dans Jésû Christ lé bieu pommyi.

J'ai couothu souotre lé fanne et l'ji,
et man bein, j'l'ai tout gâzouoilli.
J'ai couothu souotre lé fanne et l'ji,
et man bein, j'l'ai tout gâzouoilli.
Mais j'ai r'trouvé tout man pliaîsi
en Jésû Christ lé bieu pommyi.

Quand j'sis lâssé par man trawas,
à l'ombre ichîn j'trouve un assias.
Quand j'sis lâssé par man trawas,
à l'ombre ichîn j'trouve un assias.
Paîsibliément jé s'sai assis
souos Jêsû Christ lé bieu pommyi.

Chu frit a un goût d'èrva-s-y
tchi m'ravigote sus man mouothi.
Chu frit a un goût d'èrva-s-y
tchi m'ravigote sus man mouothi.
Pouor tréjous m'n âme s'sa à l'abri
auve Jêsû Christ lé bieu pommyi.

Saûticotons à Béthléhem

Les angnieaux quénotent sus les côtis,
lus gardeurs happent la pathe d'un ambron.
Oh! Dgéthotons acanté les brébis;
couothons étout ava ches monts!

Béthléhem, Béthléhem!
Saûticotons tous à Béthléhem!
Béthléhem, Béthléhem!
Saûticotons tous à Béthléhem!

Les chanmeaux chabolent par lé sablion;
i' gabathent douochement par sus les mielles;
coumme les Trais Mages cachent ava et amont;
là-haut dans l'ciel ou pâsse, l'êtaile!

Béthléhem, Béthléhem!
Saûticotons tous à Béthléhem!
Béthléhem, Béthléhem!
Saûticotons tous à Béthléhem!

À doubl'yé rang i' marchent, les Romains;
les soudards sièvent la c'mande du chent'nyi -
pouor lus appréchi d'la ville bein d'ainain,
gângni lus lyits et lus couochi!

Béthléhem, Béthléhem!
Saûticotons tous à Béthléhem!
Béthléhem, Béthléhem!
Saûticotons tous à Béthléhem!

L'âne et l'boeu, ieux, i' piétinnent étout
dans l'êtabl'ye où'est qu'l'êfant est bèrchi;
tandi qu'un tchoeu d'anges dgêpe tout à l'entou
Louangeant l'êfant tchi r'mue ses pids!

Béthléhem, Béthléhem!
Saûticotons tous à Béthléhem!
Béthléhem, Béthléhem!
Saûticotons tous à Béthléhem!

Air: Cantique 192, Recueil de Cantiques Méthodiste, 1889



Ch'est la Sèrvelle dé Noué!

Lé Bouôn Dgieu griyit l'vièr Âdam,
au c'menchement, du ponsi.
I' l'însphithit en souûffliant d'dans
auve lé souûffl'ye dé la vie.
Et lé Seigneu fit pouor ch't houmme-chîn
eune d'meuthe au Paradis,
pouor souongni les flieurs d'san gardîn,
en êt' lé gardîngni.

*Chantez des louanges à not' Saûveux
d'pis l'êfant nos fut né.
Rêjouiss'-ous don! Séyiz heutheurs!
Ch'est la Sèrvelle dé Noué!*

Et Êve et Âdam y d'meuthaient
et s'mîndrent à travailli.
À seule fin d'les garder en paix,
ainchîn l'Bouôn Dgieu lus dit:
"Mangiz-en tout excepté l'frit
tchi craît sus chu grand bouais.
Lé chein tch'en mange s'en va mouothi,
condamné à janmais."

*Chantez des louanges à not' Saûveux
d'pis l'êfant nos fut né.
Rêjouiss'-ous don! Séyiz heutheurs!
Ch'est la Sèrvelle dé Noué!*

Lé Bouôn Dgieu aime l'humanité.
Né v'là l'mithacl'ye qu'i' fit:
ès d'cendants d'Âdam êdgéthés,
i' mouontrit san pitchi.
À seule fin dé nos racater
dé chu Malîn Esprit,
et pour l'amour dé nos saûver,
i' nos env'yit san Fis.

*Chantez des louanges à not' Saûveux
d'pis l'êfant nos fut né.
Rêjouiss'-ous don! Séyiz heutheurs!
Ch'est la Sèrvelle dé Noué!*

Et achteu ch'est la sainte saison
dans tchi not' Saûveux vînt.
Séyons heutheurs, et fricotons
auve des gâches et podîns.
Pliaingnons les pouôrrés et affanmés,
baillons-lus à mangi,
et si j'l'avons bein méthité,
j'veindrons au Paradis.

*Chantez des louanges à not' Saûveux
d'pis l'êfant nos fut né.
Rêjouiss'-ous don! Séyiz heutheurs!
Ch'est la Sèrvelle dé Noué!*

The Lord at first did Adam make

Papa Noué s'en veint en Jèrri

Oh, mousses, comport'-ous!
I' n'faut pon piailli,
nitout faithe la moue,
j'vos dithai pouortchi:

Papa Noué s'en veint en Jèrri!

I' graie sa p'tite liste,
l'èrlièthant deux fais,
pouor pouver sparti
l'bouôn d'aue lé mêché.

Papa Noué s'en veint en Jèrri!

I' t'vait quand tu'es à dormi
et quand tu'es rêvilyi.
I' sait si tu'as 'té bein poli
ou à graie d'la dgiâbliéthie!

Oh, mousses, comport'-ous!
I' n'faut pon piailli,
nitout faithe la moue,
et j'dithai pouortchi:

Papa Noué s'en veint en Jèrri!

Aue frits et codrettes
et tout un amas
dé gofiches et jouettes
tchi font un camas.

Papa Noué s'en veint en Jèrri!

Les mousses veulent qu'i' mette
tout drait dans sa pouque
toutes sortes dé poupettes
et des ours en pliuque.

Papa Noué s'en veint en Jèrri!

Et les pathents à r'garder
les mousses à jopînter,
les fil'yes et garçons à jouarder
tout l'tou dé l'arb' dé Noué.

Oh, j'dithai pouortchi:
les êfants, mêfi'-ous!
I' n'faut pon piailli,
nitout faithe la moue:

*Papa Noué s'en veint
Papa Noué s'en veint
Papa Noué s'en veint
siez nous!*

Santa Claus Is Comin' to Town

Couochi dans eune établ'ye

Couochi dans eune établ'ye, sans bèr et sans liet,
lé p'tit Seigneu Jêsû est là à haûter;
les étailes êcliaithies seurvil'yent lé saint p'tchiot,
lé p'tit Seigneu Jêsû à dormi dans l'tro.

Les vaques sont à bueûler - i' r'est rêvilyi;
mais chu bouôn p'tit Jêsû n'est pon pouor piailli.
J't'aime bein, Seigneu Jêsû: seurvil'ye-mé des cieux
et reste auprès d'man bèr jusqu'à sinne dé jeu.

Vé-t-en, Seigneu Jêsû, reste acanté mé;
sai tréjous à m'dgetter, tréjous à m'aimer.
Aime touos les p'tits êfants qu'nou-s'est à bèrchi,
et reste auprès d'nos lyits jusqu'au drein soupi.

Away in a manger

Les bein bouonnes bêtes

Jésû, not' Saûveux, l'Jour dé Noué,
dans eune vielle établ'ye i' fut né
auve les bein bouonnes bêtes à l'èrgarder:
Jésû, not' Saûveux, l'Jour dé Noué.

Mé, dit l'ânon ès longues ouothelles,
j'portis sa méthe, Mathie la belle
souos l'caud solé epis l's étailes,
mé, dit l'ânon ès longues ouothelles.

Mé, dit la vague couleu dé myi,
j'lî baillis man tro pouor lé couochi
épis man fain pouor s'n ouothilyi,
mé, dit la vague couleu dé myi.

Mé, dit la brébis ès cônes corlées,
j'lî baillis d'ma laine pouor san blianket,
d'la laine pouor l'enfliuber au liet,
mé, dit la brébis ès cônes corlées.

Mé, dit la colombe, blianche coumme la né,
j'fis coucouroux pouor lé bèrchoter,
j'finmes coucouroux, ma douoche et mé,
mé, dit la colombe, blianche coumme la né.

Les bein bouonnes bêtes, bénites et belles,
racontent châtcheune sén alibèle:
coumme dans l'êtabl'ye si néthe et vielle,
il' atchilyîtent Emmanuel.

Jésû, not' Saûveux, i' fut né
dans eune êtabl'ye lé Jour dé Noué,
auve les bein bouonnes bêtes à l'entouother:
Jésû, not' Saûveux, i' fut né.

Drélîndgettes

Les rues pavées,
des rues à vaie
pouor la Fête habilyies:
à banon
y'a un esprit
d'un Bouan Noué.

Les mousses à rithe,
les gens arrivent
auve les tchoeurs bein rêjouis;
à la carre
dé châque quémîn
nou ouait:

Drélîndgettes et cliochettes:
la Fête dé Noué à Saint Hélyi.
Clioches d'argent, tchîncaillant:
bétôt ché s'sa l'Jour dé Noué.

Des veues d'affi,
les veues d'trafi
blyîntchant rouoge, or, et vèrt
coumme lé monde
rentre siez sé
auve ses trésors.

I' tchait d'la né
pouor Papa Noué
et pouor touos nos avièrs
et par-d'ssus
tout chu camas
nou ouait:

Drélîndgettes et cliochettes:
la Fête dé Noué à Saint Hélyi.
Clioches d'argent, tchîncaillant:
bétôt ché s'sa l'Jour dé Noué.

Tout chein qué j'veurs chu Noué est té

Jé n'veurs pon un tas pouor man Noué;
y'a raîque eune chose à d'sither.
Pouor dé mé ch'n'est pon les présents
arreunés souos l'arb' dé Noué.
J'veurs raîque té à tan tout seu,
raîque té pouor rêjouï man tchoeu.
V'là tch'est tout m'n espé;
tout chein qué j'veurs chu Noué est té.

Jé n'veurs pon un tas pouor man Noué;
y'a raîque eune chose à d'sither.
Pouor dé mé ch'n'est pon les présents
arreunés souos l'arb' dé Noué.
J'n'ai pon à croch'ter ma cauche là
là-haut sus l'ais d'ma cheunm'née;
Papa Noué né f'tha pon d'pliaîsi
auve eune jouette lé Jour dé Noué;
j'veurs raîque té à tan tout seu,
raîque té pouor rêjouï man tchoeu.
V'là tch'est tout m'n espé.
Tout chein qué j'veurs chu Noué est té,
Man tchoeu (Ma douoche)

Jé n'veurs pon un tas pouor man Noué;
ch'n'est pon d'la né tch'est man d'si;
j'm'en vais rester assis au dget
pouor êt' embraichi(e) souos l'dgi ;
jé n'f'thai pon eune liste pouor env'yer
liain au Nord siez Papa Noué;
j'n'm'en vais pon rester à vilyi
pouor ses chères enchorchélés.
Ch'est raïque té qué j'veurs à ces sé,
té ichîn acanté mé.
Tchi d'aut' ajouôter?
Tout chein qué j'veurs chu Noué est té,
té.

Toutes les veues sont satchies
et tout est êcliaithi.
Ouïy'-ous les brais et ris
des mousses bein rêjouis?
Épis tout l'monde à chanter
et toutes les clioches à sonner.
Papa Noué, apporte tout chein tch'i' m'faut pouor Noué,
apporte s'i' t'pliaît man tchoeu (ma douoche) siez mé.

Jé n'veurs pon un tas pouor man Noué;
j'en éthai don tant et pus
à vaie man tchoeu (ma douoche) l'avant à mé,
mâté(e) sus lé pas dé m'n us.
J'veurs raîque té à tan tout seu,
raîque té pouor rêjouï man tchoeu.
V'là tch'est tout m'n espé.
Tout chein qué j'veurs chu Noué est té,
té.

Tout chein qué j'veurs chu Noué est té.
Tout chein qué j'veurs chu Noué est té.

All I want for Christmas is you

Aussi bein qu'les Trais Rouais

Quand Jêsû 'tait un pétchiot
et né d'la Vièrge Mathie,
les preunmièrs tchi lé louangîtent
lî vîntent d'eune bèrgéthie.
Et lé-é chein tch'a des ouothelles
pouor ouï, véthe-dgia, qu'i' ouaie:
Jêsû aimait les bèrgers
aussi bein qu'les Trais Rouais.

Quand Jêsû 'tait tchèrpentchi,
atout clious et martchieaux
il apprennait san mêtchi
coumme les aut's sîmpl'yes hardgieaux.
I' chi-innait à tigue dé corps
sus bein dé buts dé bouais.
Jêsû aimait san travas
aussi bein qu'les Trais Rouais.

Quand Jêsû fut trisonné
 et env'yé à sa mort,
 né v'là tchi soûffraient aue li
 deux voleurs, des deux bords.
 Même su-us chu Mont à la Cranne
 et clioué sus la crouaix,
 ch'est qu'Jêsû aimait l'voleux
 aussi bein qu'les Trais Rouais.

Quand Jêsû, ressuscité,
 montit ès pus hauts lieux,
 i' s'assiévit pouor jugi
 là, au dêtre du Bouôn Dgieu.
 Quand j'tchi-itt'tai chute vie d'mînséthe,
 jé s'sai heutheux, car j'crai
 qué Jêsû aime lé pécheux
 aussi bein qu'les Trais Rouais.



Ny Drogh Vraane

Nos v'chîn dans la ville d'Dâvi

Nos v'chîn dans la ville d'Dâvi;
j'montons amont ses c'mîns.
Mais où'est qu'j'allons nos couochi
pouor l'êfant tch'est à v'nîn?
Louangeons don not' Bouôn Seigneu
tchi nos mouontrit lé c'mîn
tchi nos a m'né à chu lieu
dans la vielle ville, nos v'chîn.

Coumme tchi trouver eune aubèrge?
Coumme tchi trouver un liet
y couochi eune méthe tch'est Vièrge
et l'êfant tchi s'sa né?
Prions tréjous au Bouôn Dgieu
tchi dgide draît ses pèl'rîns.
Si ch'est qu'l'êfant veint achteu,
jé trouv'thons d'l'aîgue ichîn.

Mais toutes lus portes sont bârrées,
et freunmés touos lus us.

Les gens voudraient nos cârrer:
à toutes les carres - l'èrfus.

*Mais l'âne et l'boeu sont louogis
dans la carre dé l'établ'ye;
y'étha du r'pos et du ji
dans eune stâlle confortabl'ye.*

Couoche-té, bouonnefemme, sus la pâlle:
not' viage est à sa fin.

Auve lé bestchias dé la stâlle,
jé sommes siez d'bouôns anmîns.
*Ouai-tu, bouonhoumme, la chant'tie
des anges ès pus hauts lieux:
un lô-lô à l'êfant tchi
s'sa dé touos lé Saûveux?*



Nous voici dans la ville

L'Éfant à Béthléhém

Chutte fête dé Noué j'allons mèrtchi
auve tchoeu et bouoche et yi
en mémouaithe dé not' Jèsû Chri:
l'êfant à Béthlém

Driéthe i' laïssit l'Paradis
et siez nous i' d'valit,
né pouor nous dé la Vièrge Mathie:
l'êfant à Béthlém

Épis les anges chantîtent ès cieux
et vîntent nos dithe qu'achteu
pouor nous i' fut né, not' Saûveux:
l'êfant à Béthlém

Tchi grand amour, tchi sîngne dé paix
qué l'Angné nos fît vaie,
quand Jêsu géthit dans la chai:
l'êfant à Béthlêhém

Glouaithe à Dgieu dans les pus hauts lieux
tchi règne atout bonheu;
J'vions san d'si divîn achteu:
l'êfant à Béthlém



Viyiz, blianç dans les bonds d'né

Viyiz, blianç dans les bonds d'né,
l'Angné tchi pouor nous fut né.
Viyiz l'chein tch'est doux et bouan,
promîns d'pis les touos vièrs temps.

Hèque lé Saûveux tch'a 'té né!
Hèque la sinne dé jeu dé Noué!
Chantez à Jérusalem!
Hèque lé p'tchiot à Béthlém!

Dans la néthe établ'ye, couochi
est l'chein tchi fit tout ch'tchi lit,
li tchi 'tait couronné d'lueu
aue les anges ès pus hauts lieux.

Né v'chîn des bèrgers tchi veinrent
en jouaie, ayant ouï les dreïnes:
Anges et bèrgers et brébis
rêjouis d'la naïssance du Fis.

D'vièrs mînniet sus les côtis,
la nièrcheu fut êcliaithie:
un tchoeu d'anges tchi chantaient "Paix!" -
les bèrgers sont v'nus lé vaie.

Saint p'tit êfant, Fis dé Dgieu,
Angné êgaluant d'bliancheu,
né dans la né dé l'Hivé
pouor nos saûver du péché.

See amid the Winter's snow

Hèque Saint Nicolas!

Au fin tchoeu dé l'hivé,
tchi qu'il est tchi pâsse
et offre à chèque avé
eune poutchie dé grâce?
Viy'-ous l'manté lithant,
robes dé rouoge et vèrt?
Dans sa pouque, des présents
pouor touos les p'tits avièrs.
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

La sonn'nie du cliochi
pouor les prisonniers;
v'là Nico tchi geuthit
dans san rouoge et vèrt.
Lé pendard fut bliotchi.
Lé saint prêchit, "Paix
à touos ches pouôrrès blioutchis!"
Les clioches sonnêtent en jouaie.
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Bouonne cache! Nic'lesse viagit
au liain en baté;
la tempête à m'nichi,
Nico à prier.

Tout l'tou la mé rud'dgit,
les louêmes fortes et folles.

Nic'lesse mînt tout au lis
atout ses saintes patholes.

Tchi qu'est ch't engibâtré?

Li, tchi n'fait pon d'ma?

Rouoge et vèrt l'travèrs d'la né...

Hèque Saint Nicolas!

Dans eune auberge couochi,

Nic'lesse dêmuchit

les victînmes d'un bouochi -

toute eune bathilyie.

Né v'là l's èrssuscités,

châque pétchiot entchi.

Èrmèrcions l'chein tch'a r'grée

d's êfants d'sêtchilbouêtchis.

Tchi qu'est ch't engibâtré?

Li, tchi n'fait pon d'ma?

Rouoge et vèrt l'travèrs d'la né...

Hèque Saint Nicolas!

Trais hardelles en pouôrreté,
 par lé d'so d'lus péthe;
 à êt' mînses sus l'pavé,
 pèrdues en mînséthe.
 Nico prînt sa poutchie;
 lus vèrsit des louis.
 Il avait tout changi.
 Chang'-ous acanté li!
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Air: Cantique 63, Recueil de Cantiques Méthodiste, 1889



Clyînclias! Clyînclias! Clyînclias!

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Les clioches ont annonchi
qué not' Saûveux est né
souos eune étaile tchi lit.
Êcoutons les clioches dé Noué:

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Jésû est dans san bèr;
des cliochettes à l'bèrchi.
Lé camas des cliochières
tressonne pouor nos rêvilyi:

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Ès bouôns gardeurs d'brébis,
à l'angné dans lus bras,
auve un amas d'sonn'nie
les anges chantent lus hôsanna:

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Les clioches sonnent auve d'la jouaie
et font rêjoui les cieux,
l'étaile et les Trais Rouais,
les chanmeaux, et l'âne et l'boeu.

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Y'étha du cârillon
d'ilo ès pus hauts lieux.
Nou-s'en ouait lé tresson
des grandes clioches tchi r'sonnent achteu:

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Ch'est eune journée dé ji -
j'ouïyons cârillonner
partout lé monde entchi
les cliochettes du jour dé Noué:

Clyînclias! Clyînclias! Clyînclias!
Les bouonnes clioches sonnent ichîn bas!
Clyînclias! Clyînclias! Clyînclias!
Des tchoeurs d'anges ès vouaix d'méta!

Clyînclias! Clyînclias! Clyînclias!
Tchoeurs d'anges ès vouaix d'méta!
Clyînclias! Clyînclias! Clyînclias!
Les bouonnes clioches sonnent ichîn bas!

Air: Cantique 1, Recueil de Cantiques Méthodiste, 1889



Vé-t-en, bouoillon dé toute bouônté

Vé-t-en, bouoillon dé toute bouônté,
arrouôse man tchoeu d'l'ieau d'la vie,
d'valant sus mé sans s'accompter;
ch'est d's'y bangni et d'louangi.
Mène-mé dans un chant dé douocheu
auve des langues à fliambes ès cieux.
Qué l'mont sait louangi! Dans man tchoeu,
j'monte au grand amour dé Dgieu.

J'bâtithai mén Ebenhézèr
ichîn ioù qu'j'sis v'nu auve té;
auve té, jé m'dêhal'lai des d'sèrts,
j'veindrai en seûth'té siez mé.
Jésû m'traichit, un étrangi
êdgéthé liain d'san troupé.
I' m'a saûvé dé tout dangi
auve san précieux sang vèrsé.

Sa grâce est si mangnifique et
tréjous j'ai à l'èrpayi.
Qu'sa grâce m'enhalaûde et m'fique et
m'lier à man gardeux d'brébis.
À touos buts d'camp, j'abandonne tout
au Bouôn Dgieu et à la mé;
garde man tchoeu, Seigneu, à tréjous
pouor lé ciel qu'i' sait scêllé.

Come thou fount of every blessing

Mînniet, Chrêchiens

Mînniet, Chrêchiens, né v'là l'heuthe sainte tch'a sonné.
Des pus hauts lieux Dgieu d'valit dans la chai,
pouor asseûther la grâce tchi nos fut donnée
et dé d'dans l'êtabl'ye r'êtablyi la paix.
Ch'est pouor chenna qu'lé monde entchi espéthit
pouor chute belle niet tchi nos donne un Saûveux.
Agenouoill'-ous touos! La niet vos est êcliaithie!
Oh niet dé Noué! Né v'chîn not' Rédempteux!
Oh niet dé Noué! Né v'chîn not' Rédempteux!

Qué not' fouai saque eune veue trélûthante tch'îthait
nos dgider auprès du p'tchiot dans san bèr,
coumme au temps pâssé eune étaile tchi lithait
y m'nit les grands mages lé travèrs du d'sèrt.
Chu rouai des rouais est couochi dans un pouôrre tro;
Pièssants d'achteu si fièrs dans vot' grandeu,
à vot' vandgîthe lé Bouôn Dgieu vos prêche d'îlo:
Cârr'-ous! Cârr'-ous l'avant au Rédempteux!
Cârr'-ous! Cârr'-ous l'avant au Rédempteux!

Lé Rédempteux a d'senhalaûdé les bas:
la Tèrre est libre et l'Ciel nos est ouvèrt.
I' vait un fréthe où'est qu'y'avait raîque un vassa.
L'amour unnit l's enn'mîns et l's êtrangièrs.
Tchi qui s'en va l'èrmèrcier à hauteu d'vouaix?
Ch'est en tchi il a 'té né dans not' tchoeu.
Mât'-ous, bouonnes gens! Chantez-li à tout janmais!
Oh niet dé Noué! Louangeons not' Rédempteux!
Oh niet dé Noué! Louangeons not' Rédempteux!

Jésû est né!

Jésû est né! qu'nou dit ès gardeurs d'brébis.
Lé jour dé Noué, nou chante sus les côtis:
Jésû est né!
Lé jour dé Noué!
Jésû est né!
Lé jour dé Noué!

Chantons achteu pouor chèque pétchiot et angné
"Glouaithe ès hauts lieux!" pouor chu saint jouéyauté
Chantons achteu
"Glouaithe ès hauts lieux!"
Chantons achteu
"Glouaithe ès hauts lieux!"

Paix sus la tèrre à touos les bords et tréjous,
En mé, en l'air, ilo et d'en par iou.
Paix sus la tèrre,
en mé, en l'air!
Paix sus la tèrre,
en mé, en l'air!

Dé d'dans lé d'sèrt, les Mages ont siévi l'êtaile
Drait à san bèr, au p'tit Emmannuel.
Dé d'dans lé d'sèrt
drait à san bèr!
Dé d'dans lé d'sèrt
drait à san bèr!

Chantons nos louanges auve la myrrhe, l'enchens et l'or,
Auve un tchoeu d'anges au d'ssus du mousse tchi dort.
Chantons nos louanges
auve un tchoeu d'anges!
Chantons nos louanges
auve un tchoeu d'anges!

Lé jour dé Noué, siéviz l'êtaile tchi pét'il'ye!
Jésû est né! Qué tout l'monde veinge en ville!
Lé jour dé Noué!
Jésû est né!
Lé jour dé Noué!
Jésû est né!

Air: Cantique 71, Recueil de Cantiques Méthodiste, 1889



Rêvil'-ous touos!

Rêvil'-ous touos! J'tapons à vot' us!
Séyiz heutheurs! Jêsû est né!
Né dormiz d'aut'! Atchilyiz Jêsû!
Dêhal'-ous et sautez du liet!

*Les cheins tchi marchaient dans la nièrcheu,
qu'lé prophète dit, ont veu eune grande lueu.
Et v'là tchi lit! Ch'est Jêsû - not' Saûveux,
not' crâsset et not' sinne dé jeu!*

Rêvil'-ous touos! M'ttez vot' bouôn Dînmanche!
Séyiz heutheurs! Jêsû est né!
Les nâtions sont bénies dans la s'menche
d'Àbréhan, coumme ch'fut procliâmé!

*Les cheins tchi marchaient dans la nièrcheu,
qu'lé prophète dit, ont veu eune grande lueu.
Et v'là tchi lit! Ch'est Jêsû - not' Saûveux,
not' crâsset et not' sinne dé jeu!*

Rêvil'-ous touos! D'valez dans la rue!
Séyiz heutheurs! Jêsû est né!
N'ayiz pon d'peux! Lé ma est vaintchu
et touos nos péchés, racatés.

*Les cheins tchi marchaient dans la nièrcheu,
qu'lé prophète dit, ont veu eune grande lueu.
Et v'là tchi lit! Ch'est Jêsû - not' Saûveux,
not' crâsset et not' sinne dé jeu!*

Air: Canticque 168, Recueil de Cantiques Méthodiste, 1889



Eune hardi bouonne bordée d'Noué

j'sommes à vilyi
et à ces sé
j'éthons du ji
v'là tch'est assez

raïque pouor aver eune hardi bouonne bordée d'Noué
raïque pouor aver eune hardi bouonne bordée d'Noué

tchi bouonne bordée
tchi rêvillon
qu'nou connaît raïque
à chutte saïson

raïque pouor aver eune hardi bouonne bordée d'Noué
raïque pouor aver eune hardi bouonne bordée d'Noué

la dgaîngue dé mousses chantent lus cantique
clyînclias, clyînclias
clyînclias, clyînclias
clyînclias, clyînclias
ah!

raïque pouor aver eune hardi bouonne bordée d'Noué
raïque pouor aver eune hardi bouonne bordée d'Noué

à chein qu'nou dit
dans l'vaïthinné
ch'est dé trîntchi
à la santé

raïque pouor aver eune hardi bouonne bordée d'Noué
raïque pouor aver eune hardi bouonne bordée d'Noué

la dgaîngue dé mousses chantent lus cantique
auprès douze mais d'pratique
clyînclias, clyînclias
clyînclias, clyînclias
clyînclias, clyînclias

tchi bouonne bordée
et à ces sé
j'éthons du ji
v'là tch'est assez

raîque pouor aver eune hardi bouonne bordée d'Noué
raîque pouor aver eune hardi bouonne bordée d'Noué

j'sommes à vilyi
et à ces sé
j'éthons du ji
v'là tch'est assez

raîque pouor aver eune hardi bouonne bordée d'Noué
raîque pouor aver eune hardi bouonne bordée d'Noué
raîque pouor aver eune hardi bouonne bordée d'Noué
raîque pouor aver eune hardi bouonne bordée d'Noué
ah
bordée d'Noué

Né v'chîn les papillons dé né

Viyiz l'saint nouveau-né
dans un bèr si p'tit,
enfliubé en Hivé,
dans l'corps et l'esprit;
Par d'ssus l'êfant dans san bèr
v'là tchi fliotte et danse en l'air,
tout pathaît si cliai et bé -
né v'chîn les papillons dé né.

La ville est à haûter
souos un blianc lîncheu,
Coumme tchi en dêpieauter
du péché d'achteu?
V'là tchi veint nos rêvilyi,
ch'est not' Saûveux, Jêsû Chri.
Né v'chîn sa nativité -
né v'chîn les papillons dé né.

La campangne est haïchie,
 espéthan chutte jouaie.
 Lé péché est gliaichi
 souos la né tchi tchait.
 Par les clios et les côtis
 v'là tchi s'lanche à voltilyi.
 Ch'est d'nos rêjoui à ces sé -
 né v'chîn les papillons dé né.

Tout chu monde est bèrchi
 abouon toute la nïet.
 La gliaiche es'sa pèrchie
 par not' neu solé;
 i' nos r'caûff'tha auve sa chai;
 né v'chîn l'pliaïsi et la paix.
 Cache, la mînséthe et l'péché!
 Né v'chîn les papillons dé né.

Air: Cantique 35, Recueil de Cantiques Méthodiste, 1889



Quand un p'tchiot est né

Eune lueu d'espé trélûthe dans lé ciel,
et bein à haut y'a eune p'tite étaile,
et partout ou s'lève, chute neuve matinée:
chennechîn s'adonne quand un p'tchiot est né.

Un souhait sans vouaix vaile ès ochéans.
et dans les bouais nou ouait l'changement d'vent;
les muthâles du d'so lus sont êcrouôlées:
chennechîn s'adonne quand un p'tchiot est né.

Eune rôsée tchait tch'est tout d'couleu d'rose;
nou c'menche à craithe êt' sauf pouor eune pause.
Et achteu tout l'monde en sembl'yent rasseûthés:
chennechîn s'adonne quand un p'tchiot est né.

*Et tout chennechîn s'adonne viyant qu'lé monde sont à
espéther, espéther un p'tchiot - nièr, blianç, jaune, n'y'a fis
d'âme tchi l'sait... mais un p'tchiot tchi s'en va grandi et
touônnner les lèrmes en ris, la haine en amour, la dgèrre en
paix et châtchun à san vaîthîn, et la mînséthe et la
souffranche s'sont des mots à oublier à tout janmais.*

Ch'est raïque un rêve, nou-s'en est dêfait,
mais tôt ou tard tout chenna s'sa vrai;
et partout ou s'lève, chute neuve matinée:
chennechîn s'adonne quand un p'tchiot est né.

When a child is born

J'îthons chantant à Béthléhem

J'îthons chantant à Béthléhem:

tra-la-la-la-la-la-la!

P'tit Jêsu, p'tit Saûveux

j'm'en vais chanter épis t'bèrchi.

P'tit Jêsu, p'tit Saûveux

j'm'en vais chanter à tan bèr.

Joue Dgémîn! Prans ta pouque à vent:

houinne et houinne et houinne et ouah!

P'tit Jêsu, p'tit Saûveux

J'm'en vais chanter épis t'bèrchi

P'tit Jêsu, p'tit Saûveux

J'm'en vais chanter à tan bèr

Jeannot, fai tan pipelot piper:

pipe et pipe et pipe au pas!

P'tit Jêsu, p'tit Saûveux

j'm'en vais chanter épis t'bèrchi.

P'tit Jêsu, p'tit Saûveux

j'm'en vais chanter à tan bèr.

Et té, Nico, vîngnonne acouo:
vîngnonne, vîngnonne, vîngnonne, va!
P'tit Jêsû, p'tit Saûveux
j'm'en vais chanter épis t'bèrchi.
P'tit Jêsû, p'tit Saûveux
j'm'en vais chanter à tan bèr.

Et Louothains, fai la bâsse bueûler:
bueûle et bueûle et bueûle et bas!
P'tit Jêsû, p'tit Saûveux
j'm'en vais chanter épis t'bèrchi.
P'tit Jêsû, p'tit Saûveux
j'm'en vais chanter à tan bèr.

Ouïy'-ous, ouïy'-ous, gardeurs d'brébis?

Ouïy'-ous, ouïy'-ous, gardeurs d'brébis,
dans la niet chute nouvelle chant'tie
d'un cantique céleste et doux
à Béthléhem et tout l'tou?

Ch'est d's anges tch'ont geuthi à ces sé,
lus m'sage dé glouaithe à procliâmer;
lé p'tit mousse n'en ouïtha rein
couochi douochement dans l'êtrain.

Chu p'tit êfant est l'fis dé Dgieu,
tch'est v'nu sus la tèrre coumme un dgeux;
couochi sans couronne ni glouaithe,
lé p'tchiot d'eune humbl'ye et pouôrre méthe.

Né v'chîn i' viagent dé l'Êst au Vouêt,
trais avisés, trais piêssants rouais,
pouor offri louanges et honneurs
au p'tit Seigneu des seigneurs.

Et j'veindrons iou qu'il est couochi;
ch't' établ'ye èrsembl'ye au paradis
où'est qu'les anges procliâment ès cieux
qu'ichîn d'meuthe lé fis dé Dgieu.

Lé Cantique du Coucou

Lé coucou volit hors d'la bouaîs'sie
Coucou!
jusqu'au bèr où'est qu'l'êfant 'tait pliaichi
Coucou!
chantant san cantique dé bonheu
lé coucou loûsit san Seigneu:
Coucou, coucou, coucou!

La colombe jutchie là-haut sus l'faît
Ronron!
s'êcantit dêliêment à ronner
Ronron!
Oulle avait tant d'ordgi et d'jouaie
d'saver qu'lé p'tit Jêsû 'tait né:
Ronron, ronron, ronron!

La teurtéthelle à l'êtabl'ye volit
Coucouroue!
au bèr à Jêsû pouor l'atchilyi
Coucouroue!
du fond d'sa fale, du fond d'san tchoeu
ou chantit au p'tchiot tch'est l'Saûveux:
Coucouroue, coucouroue, coucouroue!

Par les chénolles crève-tchoeu

Par les chénolles, par les chénolles crève-tchoeu,
par les chénolles, par les chénolles crève-tchoeu
tchi qu'y marchit? tchi qu'y marchit?
La méthe dé not' Seigneu.
Tchi qu'y marchit? tchi qu'y marchit?
La méthe dé not' Seigneu.

Ou rencontrit là la sainte Lîzabé,
ou rencontrit là la sainte Lîzabé
"Ioù qu'tu vais, té, ioù qu'tu vais, té,
ma couôsinne, à ces sé?
Ioù qu'tu vais, té, ioù qu'tu vais, té,
ma couôsinne, à ces sé?"

"J'm'en vais, couôsinne, j'm'en vais à la chapelle,
j'm'en vais, couôsinne, j'm'en vais à la chapelle,
ouï les vêpres là, ouï les vêpres là;
où'est qu'la chant'tie est belle;
ouï les vêpres là, ouï les vêpres là;
où'est qu'la chant'tie est belle."

"Nou-fait, couôsinne, n'va pon à la chant'tie!
Nou-fait, couôsinne, n'va pon à la chant'tie!
J'm'en vais té dithe, j'm'en vais té dithe,
qué tu'éthas un p'tit fis.
J'm'en vais té dithe, j'm'en vais té dithe,
qué tu'éthas un p'tit fis.

Tu l'éthas quand l'monde en s'sont touos rêjouis.
Tu l'éthas quand l'monde en s'sont touos rêjouis.
Mais i' gèle dû, mais i' gèle dû,
touos les fontaines et pits.
Mais i' gèle dû, mais i' gèle dû,
touos les fontaines et pits.

Tchi qui créthait en ouïyant chute nouvelle,
tchi qui créthait en ouïyant chute nouvelle
qu'y'étha un fis, qu'y'étha un fis,
né d'eune vièrge, d'eune hardelle?
Qu'y'étha un fis, qu'y'étha un fis,
né d'eune vièrge, d'eune hardelle?

Duthant les fêtes, duthant les fêtes dé Noué,
duthant les fêtes, duthant les fêtes dé Noué
quand les fontaines, quand les fontaines
et les pits sont touos g'lés,
quand les fontaines, quand les fontaines
et les pits sont touos g'lés."

N'y'a pon d'ouaîsé, ni mouosson ni raîté,
n'y'a pon d'ouaîsé, ni mouosson ni raîté;
raîque la néthe froid, raîque la néthe froid,
raîque eune touothâle dé né,
raîque la néthe froid, raîque la néthe froid,
raîque eune touothâle dé né.

Y'a eune seule ieau tchi n'avait pon tout g'lé,
y'a eune seule ieau tchi n'avait pon tout g'lé,
où'est qu'la Mathie, où'est qu'la Mathie
s'en fut qu'si eune bouqu'tée
pouor san Jêsû, pouor san Jêsû
pouor douochement lé laver.

Byla cesta, byla ušlapaná

Lô-lô achteu p'tit Jêsû

Lô-lô achteu p'tit Jêsû,
p'tit Jêsû, j'té m'ttons un bieu blianket d'ssus;
j'nos'n'allons douochement t'bèrchi
pouor qu'tu piêsse en paix dormi.
Lô-lô achteu p'tit Jêsû
j'té m'ttons un bieu blianket d'ssus.

Lô-lô achteu chièr pétit,
chièr pétit, p'tit êfant dé Sainte Mathie;
j'nos'n'allons douochement t'bèrchi
pouor qu'tu piêsse en paix dormi.
Lô-lô achteu chièr pétit,
p'tit êfant dé Sainte Mathie.

Au bér du saint éfant

Lé monde affliquent à Béthlém; l'auberge est plieine à Béthlém; j'n'éthons pon d'liet à Béthlém; pouor couochi l'saint êfant.

Mais y'a du run là dans l'êtabl'ye,
auve lé boeu et l'âne dans l'êtabl'ye
ichîn j'éthons caud dans l'êtabl'ye
j'y couoch'chons l'saint êfant.

Des troupieaux d'brébis ès côtis
pâissent bein paisibl'yes par les côtis;
i' bêent auve les anges ès côtis
en louangeant l'saint êfant.

Lé ciel est sablionné d'êtailes;
 tout y'est êcliathi par l's êtailes.
 Y'en a tchi siêthent eune belle étaile
 pouor v'nîn au saint êfant.

Ch'est un long but à Béthlém;
faïthons not' c'mîn à Béthlém;
j'îthons bêtôt à Béthlém;
au bèr du saint êfant.

Air: Cantique 114, Recueil de Cantiques Méthodiste, 1889



Ayiz eune jouaiyeuse et bouonne Fête dé Noué

Ayiz eune jouaiyeuse et bouonne Fête dé Noué;
rêjouiss'-ous tréjous;
d'chu moment
toutes nos gênes s'sont bein liain dé nous.

Ayiz eune jouaiyeuse et bouonne Fête dé Noué;
qu'la saison r'sait dgaie;
d'chu moment
toutes nos gênes s'sont bein hortés la vaie.

Et nos r'v'chîn coumme au temps pâssé,
janmais lâssés d'êt' ensembl'ye,
coumme les anmîns bein près d'nos tchoeurs
et bein heutheurs lus rassembl'yent.

Châque année j'nos rassembliéthons tréjous,
s'lon lé d'si dé Dgieu.
M'ttez eune étaile sus l'arb' coumme ou lit ès cieux,
et ayiz eune bein jouaiyeuse Fête dé Noué achteu.

Have yourself a merry little Christmas

À haut à marchi

j'sommes à haut à marchi
à lôvier souos la leune tchi lit
et j'sommes à voler par d'ssus la tèrre endormie

j'y sis bein cramponné
à cachi dans chu bliu mînniet
j'ai dêmuchî lé s'gret d'voler acanté té

j'pâssons des pays
des vaîthinnés à rêvachi
des dous et des montangnes, des bouaîs'sies et côtis

atout d's ièrs êcalés
d'un embron trans'mé
un châtchun craithait qu'il est à rêver

j'sommes à haut à dgêper
à nagi dans chu ciel bein g'lé
et j'sommes à fliotter par d'ssus des monts couèrts dé né

pis ava, voltilyant
à flieur d'ochéan
j'rêvilyons un pièssant païsson ébaïllant

j'sommes à haut à marchi
à valser l'travers d'eune niêthchie
et là-bas l'monde rêjouis veulent bein nos atchilyi

Un Lô-lô d'Noué

Néthe coumme la Bibl'ye
et bâsse est la nièrcheu;
sans brit sont les cieux;
ès clios, ès bouais,
les bêtes sont paisibl'yes;
"Tais'-ous," dit l'vent du Vouêt.
Couoche-té don et dors, moussetchet -
couoche-té en paix, moussetchet:
chutte matinnée
à l'assinne dé Noué,
tu t'rêvil'las au d'si du tchoeu.

Tchi pouôrre rouoyaume
tch'est l'humbl'ye siez-sé
dé man p'tchiot tréjous rouai!
Et en haûtant,
lé rêve tchi m'enfaûtôme
lé couronn'na d'dgiamant.
Couoche-té don et dors, moussetchet -
couoche-té en paix, moussetchet:
chutte matinnée
à l'assinne dé Noué,
tu t'rêvil'las au d'si du tchoeu.

Chutte matinnée
à l'assinne dé Noué,
tu t'rêvil'las au d'si du tchoeu.
Chutte matinnée
à l'assinne dé Noué,
tu t'rêvil'las au d'si du tchoeu.

Lé Cantique du Pommyi

Dans l'gardîn y'a un pommyi;
dé tchi j'tchilyons les frits.
Mathie nos donnit un fis;
san nom est Jêsû Chri.

Dans l'gardîn y'a un pommyi;
san frit est dans l'preinseu.
Mathie nos donnit un fis;
tch'est not' chièr p'tit Saûveux.

Dans l'gardîn y'a un pommyi;
bév'tonnons un lèrmîn.
Mathie nos donnit un fis;
tchi touônnit l'ieau en vîn.

Dans l'gardîn y'a un pommyi;
lé mar est êglianmi.
Mathie nos donnit un fis;
et pouor nous i' sangnit.

Dans l'gardîn y'a un pommyi;
san cidre a du pitchet.
Mathie nos donnit un fis;
pouor qu'san sang fûsse vèrsé.

Dans l'gardîn y'a un pommyi;
lé pus bé d'touos les bouais.
Mathie nos donnit un fis;
qu'nou cliouit à la crouaix.

Dans l'gardîn y'a un pommyi;
san frit est bouôn et bé.
Mathie nos donnit un fis;
tchi des morts fut souôl'vé.

Dans l'gardîn y'a un pommyi;
dé tchi l'doux cidre nou bait.
Mathie nos donnit un fis;
tch'est not' Seigneu et Rouai.

Dans l'gardîn y'a un pommyi;
à Noué ses branques sont nues.
Mathie nos donnit un fis;
tchi fait flieuthi l'salut.

Dans l'gardîn y'a un pommyi;
vèrsons-lî eune verrée.
Mathie nos donnit un fis;
j'vos souhaitons un Bouan Noué.

Air: Cantique 99, Recueil de Cantiques Méthodiste, 1889



Les ouaïsieux dans lé gardîn

Les ouaïsieux dans lé gardîn
tuitent la nouvelle ès bouais
et la tuit'tie dé l'ouaïth'lîn
nos rempliéthà dé jouaie:
la rouoge-gorge et lé bliûtîn
auve toutes les vouaix des bouais
*Chantons pouor louangi Jêsû;
dansons car il est né;
mangeons en as-tu en veurs-tu,
car ch'est la bouonne fête dé Noué.*

Les pliantes l'avant ès maïsons
sont fliethies en mèrvèlle;
j'y viyons hortès lus saïson
les roses et g'zettes si belles.
Mais tch'est qu'en s'sait la raïson?
La naïssance d'eune mèrvèlle!
*Chantons pouor louangi Jêsû;
dansons car il est né;
mangeons en as-tu en veurs-tu,
car ch'est la bouonne fête dé Noué.*

Né v'là ès clios, les brébis
bêent jouaiyeusement en tchoeu.
Les troupieaux sont bein rêjouis
d'ouï pâler d'un Saûveux,
et saûticotent ès côtis
auve un cantique au tchoeu.
*Chantons pouor louangi Jêsû;
dansons car il est né;
mangeons en as-tu en veurs-tu,
car ch'est la bouonne fête dé Noué.*

Et par les banques et fossés,
 les mouques à myi bourdonnent,
 par un bieu solé d'Hivé
 tchi lit et caûffe et donne
 dé s'n or à la jouéyauté.
 Et l's anges ès cieux bourdonnent.
Chantons pouor louangi Jêsu;
dansons car il est né;
mangeons en as-tu en veurs-tu,
car ch'est la bouonne fête dé Noué.

L'année est au pilôsi;
 lé monde est sens d'ssus d'ssous;
 la vie a 'té toute changie
 pouor ieux et vous et nous:
 j'éthons l'salut et la vie,
 même sans richesses ni sou.
Chantons pouor louangi Jêsu;
dansons car il est né;
mangeons en as-tu en veurs-tu,
car ch'est la bouonne fête dé Noué.

Air: Cantique 129, Recueil de Cantiques Méthodiste, 1889



J'y chantons not' hodgîngnole

J'y chantons not' hodgîngnole
not' hodgîngnole, not' Noué;
j'y couothons par les chénoles
dé La Rocque à Grosnez!

*Jouaie et amour à té
et étout à ta santé!
Qu'Dgieu té bénisse et t'env'ye eune bein bouonne année
et qu'Dgieu t'env'ye eune bein bouonne année.*

Not' dgichon est faichonné
en bouon bouais d'la bouaïs'sie.
Prans du cidre épis vèrse-y
d'ta miyeu bathilyie!

*Jouaie et amour à té
et étout à ta santé!
Qu'Dgieu té bénisse et t'env'ye eune bein bouonne année
et qu'Dgieu t'env'ye eune bein bouonne année.*

Jé n'sommes pon des tchaîmands
à tcheûter par les c'mîns,
mais j'sommes dé tes connaîssants,
les mousses à tes vaithîns!

*Jouaie et amour à té
et étout à ta santé!
Qu'Dgieu té bénisse et t'env'ye eune bein bouonne année
et qu'Dgieu t'env'ye eune bein bouonne année.*

Apporte-nous un mio d'podîn
épîs d'la gâche sus l'ais,
d'la pitchette et tchiques pénîns;
j't'èrmèrcions bein des fais!

*Jouaie et amour à té
et étout à ta santé!
Qu'Dgieu té bénisse et t'env'ye eune bein bouonne année
et qu'Dgieu t'env'ye eune bein bouonne année.*

Here we come a wassailing

Bouanne Fête dé Noué!

Bouanne Fête dé Noué!

Châque chandelle êcliaithe siez châtchun san tchoeu.

Viyiz la veue, l'êtîncelle et lé feu!

Tout r'lit atout l'amour dé Dgieu;

tout chante acanté les anges ès cieux:

Bouanne Fête dé Noué! Bouanne Fête dé Noué!

À Béthléhem,

y'a un p'tit êfant à dormi dans l'tro;

y'a des gardeurs dé brébis dans les clios.

Viyiz les présents d's avisés!

Tout est changi d'pis qu'chu p'tchiot fut né

à Béthléhem, à Béthléhem.

Dors, p'tit êfant!

Bèrchi dans l'êtabl'ye acanté les bêtes,

qu'i' n'y'ait pon d'brit pouor té badrer la tête.

Tâis'-ous! Qu'i' n'y'ait d'aut' dé hèrtchîn.

Séyiz trantchil'yes siez l'dormieux divîn!

Dors, p'tit êfant! Dors, p'tit êfant!

Air: Cantique 146, Recueil de Cantiques Méthodiste, 1889



À la Sainte Lucie

Aniet, la Sainte Lucie, séthée au tchoeu d'l'Hivé;
lé monde, tchi 'tait à l'ombre, vait cliai à ces sé.

*Êtailes à nos prêchi, couronne à pétilyi
pouor nos êmèrvilyi à la Sainte Lucie.*

Épis la bouonne nouvelle lit atout san blianc feu;
toute carre enfaûtomée - clièrgie par sa lueu.

*Êtailes à nos prêchi, couronne à pétilyi
pouor nos êmèrvilyi à la Sainte Lucie.*

La niet est horte achteu, né v'chîn la sinne dé jeu;
chu monde es'sa netti, tout fliambant fîn neu.

*Êtailes à nos prêchi, couronne à pétilyi
pouor nos êmèrvilyi à la Sainte Lucie.*

Donne-mé man Noué aniet

*Noué! Noué! Man Noué, man Noué!
Man Noué, s'i' vos pliaît!
Man Noué! Donne un morcé
d'gâche sus l'but dé l'ais!*

Noué! Noué! Man Noué!
Donne-mé man Noué aniet:
eune modgie dé chaûdé
et eune gâche fouôrrée.

*Noué! Noué! Man Noué, man Noué!
Man Noué, s'i' vos pliaît!
Man Noué! Donne un morcé
d'gâche sus l'but dé l'ais!*

Noué! Noué! Man Noué!
Donne-mé man Noué aniet:
un gobîn dé pâté
et eune bouonne vèrrée.

*Noué! Noué! Man Noué, man Noué!
Man Noué, s'i' vos pliaît!
Man Noué! Donne un morcé
d'gâche sus l'but dé l'ais!*

Noué! Noué! Man Noué!
Donne-mé man Noué aniet:
eune paithe dé Chaûmonté,
eune pomme dé Choutchet.

Tch'est qui s'est pâssé à ces sé?

Tch'est qui s'est pâssé à ces sé?
À Béthléhem, ville dé Judée?
Tch'est qui s'est pâssé à ces sé?
Pouortchi chu camas, chu tinné?
Tch'est qui s'est pâssé à ces sé?

*Un fis nos a 'té né aniet,
tch'est v'nu à seule fin d'nos saüver.
Paix sus la tèrre étout ès cieux!
Glouaithe au Bouôn Dgieu ès pus hauts lieux!
Un fis nos a 'té né aniet!*

Où'est qu'i' sont les gardeurs d'brébis?
Et l'troupé à banon ès clios?
Où'est qu'i' sont les gardeurs d'brébis?
Ont-i' trouvé lé p'tchiot dans l'tro?
Où'est qu'i' sont les gardeurs d'brébis?

*Un fis nos a 'té né aniet,
tch'est v'nu à seule fin d'nos saüver.
Paix sus la tèrre étout ès cieux!
Glouaithe au Bouôn Dgieu ès pus hauts lieux!
Un fis nos a 'té né aniet!*

Iou qu'i' vont ches hoummes avisés?
Pouortchi qu'i' sièthent l'êtaile tchi lit?
Iou qu'i' vont ches hoummes avisés?
Ont-i' des présents à bailli?
Iou qu'i' vont ches hoummes avisés?

*Un fis nos a 'té né aniet,
tch'est v'nu à seule fin d'nos saüver.
Paix sus la tèrre étout ès cieux!
Glouaithe au Bouôn Dgieu ès pus hauts lieux!
Un fis nos a 'té né aniet!*

Pouortchi qu'Hérode est si mârri?
 Chu rouai est-i' quâsiment fo?
 Pouortchi qu'Hérode est si mârri?
 Est-i' pour machacrer les p'tchiots?
 Pouortchi qu'Hérode est si mârri?

*Un fîs nos a 'té né aniet,
 tch'est v'nu à seule fin d'nos saûver.
 Paix sus la tèrre étout ès cieux!
 Glouaithe au Bouôn Dgieu ès pus hauts lieux!
 Un fîs nos a 'té né aniet!*

Av'-ous ouï les anges à chanter?
 J'éthons-t-i' ichîn bas d'la paix?
 Av'-ous ouï les anges à chanter?
 Chant'-ous auve ieux lus chant dé jouaie?
 Av'-ous ouï les anges à chanter?

*Un fîs nos a 'té né aniet,
 tch'est v'nu à seule fin d'nos saûver.
 Paix sus la tèrre étout ès cieux!
 Glouaithe au Bouôn Dgieu ès pus hauts lieux!
 Un fîs nos a 'té né aniet!*

Air: Cantique 60, Recueil de Cantiques Méthodiste, 1889



Béthléhem

À Béthléhem, ville dé Judée,
il est dit dans la Bibl'ye
qué Jêsû Chri lé fis dé Dgieu
fut né lé Jour dé Noué.

*Êcoutez don les anges tchi chantent,
êcoutez à lus m'sage:
i' dithent qu'aniet
l'fis dé Mathie
s'sa né à Béthléhem.*

Joseph, Mathie, et la p'tite âne,
traichîdrent éyou s'couochi.
Dans l'êtabl'ye i' trouvîdrent eune tâne
pouor Jêsû dans l'râclyi.

*Êcoutez don les anges tchi chantent,
êcoutez à lus m'sage:
i' dithent qu'aniet
l'fis dé Mathie
s'sa né à Béthléhem.*

Les bèrgers, dans les clios couochis,
vîdrent l'êtaile si brillante
et ouîdrent lé chant tchi v'nait du ciel
lus dithe les bouonnes nouvelles.

*Écoutez don les anges tchi chantent,
 écoutez à lus m'sage:
 i' dithent qu'aniet
 l'fis dé Mathie
 s'sa né à Béthléhem.*

Les trais sages hoummes et les bèrgers
 s'en fûdrent à Béthléhem,
 et dans l'êtabl'ye sus l'fain couochi
 lé p'tit Jêsû dormait.

*Écoutez don les anges tchi chantent,
 écoutez à lus m'sage:
 i' dithent qu'aniet
 l'fis dé Mathie
 s'sa né à Béthléhem.*

Sonnez les clioches, chantez en glouaithe:
 not' nouvieu rouai est né,
 et l'houmme vivtha ètèrnellement
 à cause du Jour dé Noué.

*Écoutez don les anges tchi chantent,
 écoutez à lus m'sage:
 i' dithent qu'aniet
 l'fis dé Mathie
 s'sa né à Béthléhem.*

Air: Cantique 172, Recueil de Cantiques Méthodiste, 1889



En Galilée i' nos est dit

En Galilée i' nos est dit,
Garçons et fil'yes du p'tit village,
Y'avait étout des p'tits êfants,
P'tits, p'tits, touos p'tits, touos p'tits.

Et Jêsu Chri d'meuthait tout près,
Garçons et fil'yes du p'tit village,
Près d'lus d'meuthie et méthe chiéthie,
P'tits, p'tits, touos p'tits, touos p'tits.

Lus méthes chiéthies, ou pouvez craithe!
Garçons et fil'yes du p'tit village,
Voulaient tant qu'i' bénisse les p'tits,
P'tits, p'tits, touos p'tits, touos p'tits.

Mais les discipl'yes né voulaient pon,
Garçons et fil'yes du p'tit village,
qu'les êfants vînssent à Jêsu Chri,
P'tits, p'tits, touos p'tits, touos p'tits.

Mais Jêsu dit: Laïssiz-les v'nîn,
Garçons et fil'yes du p'tit village,
Et les méthes étaient toutes ravies!
P'tits, p'tits, touos p'tits, touos p'tits.

Faut qui sait seu partoute la tère,
Garçons et fil'yes du p'tit village,
Christ les bénit même dans ses bras,
P'tits, p'tits, touos p'tits, touos p'tits.



Trais rouais d'l'Êst, hoummes avisés

Trais rouais d'l'Êst, hoummes avisés
auve des presents, v'nez donner
vos louanges au p'tit Christ tch'est né:
Cum Virgine Maria.

L'or, ch'est un présent rouoya;
L'enchens, pouor san rectorat;
La myrrhe, ch'est s'n onguent finna:
Cum Virgine Maria.

N'y'a pon d'fin à san pouver;
i' règne sus tout tch'a 'té grée;
tout s'pâsse s'lon san bouôn vouler:
Cum Virgine Maria.

À li sait toute louange, toute glouaithe,
toute honneu et toute victouaithe;
jé n'pouôrrons janmais nos taithe:
Cum Virgine Maria.

les anges en tchoeu prannent lé vo;
i' chantent d'ite coumme d'ito
pouor chu mousse bèrchi dans l'tro:
Cum Virgine Maria.

Chantons touos à l'lun en Trais
en tchoeu nos cantiques dé jouaie
pouor l'béni à haûteu d'vouaix:
Cum Virgine Maria.

Craûle douochement, bèr

Craûle douochement, bèr:
lé saint p'tchiot s'est accliâssé.
Craûle douochement, bèr:
i' sauv'tha touos l's avièrs.
Craûle douochement, bèr:
au son des cantiques dé Noué,
les bouais lus vèrquent ès côtis à ces sé.

Vente douochement, vent:
un mithacl'ye est à s'pâsser.
Vente douochement, vent:
qu'i' sait au lis, ch't êfant.
Vente douochement, vent:
qu'la bouonne nouvelle sait soûffliée
qu'les brébis bêent ès côtis à ces sé.

Caûffe douochement, feu:
lé p'tit êfant est lâssé.
Caûffe douochement, feu:
acanté l'âne et l'boeu.
Caûffe douochement, feu:
coumme tes fliambes êcliaithent la niet,
les étailes lithent ès côtis à ces sé.

Tchai douochement, né:
 les bonds d'né y sont tâssés.
 Tchai douochement, né:
 né v'chîn l's hoummes avisés.
 Tchai douochement, né:
 un tas d'présents sont donnés
 au mousse tch'a 'té né pouor nous à ces sé.

Chante douochement, tchoeu:
 né rêvilyiz pon l'avé.
 Chante douochement, tchoeu:
 étout ès pus hauts lieux.
 Chante douochement, tchoeu:
 "Paix sus la tèrre" sait chantée
 par lé tchoeu d'anges ès côtis à ces sé.

Air: Cantique 185, Recueil de Cantiques Méthodiste, 1889



Qu'i' tchaie d'la né, tchaie d'la né, tchaie d'la né

Oh par les c'mîns i' fait eune afraid d'tchian,
mais j'avons un bouôn feu caûffant,
et d'pis qu'j'y sommes embottés,
qu'i' tchaie d'la né, tchaie d'la né, tchaie d'la né!

N'y'a autchun sîngne dé clièrgeon,
mais j'ai du mangi et d'la bouaïsson.
Les veues ont 'té dêtouônées,
qu'i' tchaie d'la né, tchaie d'la né, tchaie d'la né!

Quand j'dithons à la fin bouonne niet,
jé s'sai sus l'pavé ou autant vaut!
Mais s'tu veurs vraînment m'cadlinner,
en rallant siez mé j'éthai caud.

Lé feu est douochement à s'baïssi,
j'sommes, ma douoche, à nos embraichi,
et s'tu t'en vas tréjous m'aimer
qu'i' tchaie d'la né, tchaie d'la né, tchaie d'la né!

Let It Snow! Let It Snow! Let It Snow!

Les clioches dé Noué

Les clioches à ces sé
lus en vont sonner
auve lé boeu bueûler
et l'âne braithe qué d'pus bé:
Un p'tchiot a 'té né
et dans l'tro êtrav'lé.
Ouïyiz les clioches dé Noué à sonner à ces sé!

Les clioches à ces sé
lus en vont sonner.
Des anges d'valent des cieux
pouor louangi lé Bouôn Dgieu,
et en tchoeu chanter
par lé ciel êtailé.
Ouïyiz les clioches dé Noué à sonner à ces sé!

Les clioches à ces sé
lus en vont sonner.
Des gardeurs d'brébis
gabathent des fraids côtis
auve un p'tit agné,
un p'tit agné tchi bée.
Ouïyiz les clioches dé Noué à sonner à ces sé!

Les clioches à ces sé
 lus en vont sonner.
 Des hommes avisés
 ont dé tchi à donner -
 des bein riches présents:
 la myrrhe, l'or et l'enchens.
 Ouïyiz les clioches dé Noué à sonner à ces sé!

Les clioches à ces sé
 lus en vont sonner.
 Rêjouiss'-ous tous don!
 Et auve du rêvillon
 atchilyiz l'avé
 tch'est v'nu pouor nos saûver!
 Ouïyiz les clioches dé Noué à sonner à ces sé!

Air: Cantique 29, Recueil de Cantiques Méthodiste, 1889



Mé, j'voudrais vaie un bieu bianc Noué

Mé, j'voudrais vaie un bieu bianc Noué
coumme les cheins à tchi qu'j'ai rêvé
auve des bouais aube-gélés et des mousses au dget
pouor ouï des clioches dans la né.

Mé, j'voudrais vaie un bieu bianc Noué
coumme sus les cartes dé Noué qu'j'êcris.
Qu'tes jours saient tréjous êcliaithis
et qué siez té châque Noué sait bianchi.

I'm dreaming of a white Christmas

Lé Cantique du Tchoeuryi

Maît' Joseph 'tait un bouôn vyi,
un vyi bouon à mathier,
quand i' s'mathyit à Mathie
du pays d'Galilée.

Joseph et Mathie pâssaient
par un gardîn à frit
dé tchi les tchoeurièrs portaient
des tchoeurs comme eune sangnie.

Mathie en eut un affit
et dit bein tchoeuthûment:
"Tchil'ye-mé un tchoeur, chièr Joseph,
pouor mé et mén êfant."

Là-d'ssus Joseph vînt mârri,
et dit dans un grand d'so:
"Qué ch'tî-chîn louoche lé tchoeuryi
tch'a 'té l'péthe à tan p'tchiot!"

Épis l'êfant s'êcatchit
dans la bielle à sa méthe:
"Baïsse tes branques, arb', pouor Mathie;
Joseph n'en étha dgéthe."

Lé pus haut tchoeuryi s'baïssit;
Mathie tchilyit des tchoeurs,
des tchoeurs rouoges comme eune sangnie
d'un corps morté tchi meurt.

Mange tes rouoges tchoeurs, don, Mathie.
Joseph, né fai pon d'teurs:
l'êfant tchi c'mande un tchoeuryi,
quémand'da touos nos tchoeurs.

Lé Cantique dé la Sèrvelle dé Noué

Né v'chîn les fêtes tchi r'veinnent;
lé Saint P'tchiot r'est ichîn.
Cârr'-ous d'pits et d'fontaines
dé tchi l'ieau touônent en vîn.
*Ch'est la niet quand tout s'sa changi:
lé Salut veindra auve lé Fis.*

Les clioches dé Noué clyîncâlent:
ch'est l'apprèche dé mînniet.
V'là les vaques dans lus stâles
à g'nouors pouor l'adouother.
*Ch'est la niet quand tout s'sa changi:
lé Salut veindra auve lé Fis.*

Pliaichiz du housse à haut;
ch'est d'pather not' siez-nous
pouor pliaithe ès p'tits faîchieux
et à tout l'monde étout.
*Ch'est la niet quand tout s'sa changi:
lé Salut veindra auve lé Fis.*

(sus l'air dé "Hills of the North rejoice")

Dansons lé tou dé l'arb' dé Noué

Dansons lé tou dé l'arb' dé Noué
et j'éthons eune bouonne séthée.
Viy'-ous où'est qu'lé dgi est croch'té;
châque coupl'ye est pouor s'y'arrêter.

Dansons lé tou dé l'arb' dé Noué;
l'esprit d'Noué est mangnifique.
Pus tard jé mang'geons du pâté
épis chant'tons des cantiques.

Ous éthez un sentiment bein jouaiyeux en ouïyant
d'la chant'tie en excitation:
“Prans du housse pouor décorâtion”

Dansons lé tou dé l'arb' dé Noué;
qué tout l'monde lèvent lé dgéthet.
Lé monde lus rêjouissent à danser
dèrché comme au temps pâssé.

Jésû veint au haut dg'ieau

Havo! J'îthons à la pêque,
j'nos saûssons dans l'salut;
si chutte nouvelle nos chaûmêque,
i' nos r'pêqu'tha, Jêsû.
Nos péchés s'sont lavés hors
en mé, comme sus la tèrre,
par cause dé chu p'tchiot tchi dort,
à Béthléhem dans l'bèr.

Des brébis blianches comme du r'sîn,
et d's anges habilyis d'glouaithe,
la véthité en vrégîn
racontent chu saint mystéthe:
qu'eune mathée d'grâce a monté,
qu'lé bonheu bat san pliein,
les louêmes sont à raconter
qué l'haut dg'ieau d'jouié nos veint.

L'êtaile s'y rade en lithant;
la jouaie nos veint au fliot
et n'y'étha pon d'èrtithant
du salut v'nu dans l'tro.
Eune mathée d'ches bouonnes nouvelles
chantées par l's anges à haut,
ès clios, ès montangnes, ès mielles:
Jêsû veint au haut dg'ieau.

Air: Cantique 94, Recueil de Cantiques Méthodiste, 1889



V'là qu'ou r'quémenche, la saison dé nos rêjoui

V'là qu'ou r'quémenche, la saison dé nos rêjoui:

ch'est la Fête dé Noué!

Et bétôt j'r'îthons boutitchi

dans les boutiques bein êcliaithies,

auve des chucrîns et jouettes à acater.

V'là qu'ou r'quémenche, la saison dé nos rêjoui:

Lé housse r'est pendu.

Mais la pus belle couronne qu'i' y'ait s'sa la couronne qué nou vait
siez sé sus sén us.

Des p'tites gâches à chucre et des ourses en pliuque

pour faïthe pliaïsi ès p'tchiots et avièrs;

des boutelles dé porto et un tas d'tchi acouo

pour l'bouon amendement des vielles et vièrs;

et M'mée et P'pée souhait'taient l'èrtou ès cliâsses des êcolièrs.

V'là qu'ou r'quémenche, la saison dé nos rêjoui:

ch'est la Fête dé Noué!

Y'a un arb' dans lé Vièr Marchi,

et les veues ont 'té haûlîndgies,

et ch'est d'espéther ofûche eune achie d'né.

V'là qu'ou r'quémenche, la saison dé nos rêjoui:

ch'est la Fête dé Noué!

Les clioches sonnent et i' s'adonne

qué l'cantique qué nou chantonne

sonne tréjous siez sé.

V'là qu'ou r'quémenche, la saison dé nos rêjoui:

lé housse r'est pendu.

Mais la pus belle couronne qu'i' y'ait s'sa la couronne qué nou vait
siez sé sus sén us.

Bein, Noué est r'vénu!

It's beginning to look a lot like Christmas

Lé Cantique dé Coventré

Lô-lô, lô-lô, dors ilo pétit p'tchiot

Lô-lô, lô-lô, lô-lô

Lô-lô, man p'tit p'tchiot

Lô-lô, lô-lô, lô-lô

Mes soeurs, comme tchi bein l'protégi
achteu contré tout dro?

Qu'chu pouôrré êfant ouaie bein not' chant:

Lô-lô, lô-lô, lô-lô

Hérode lé rouai sans drouait ni paix

a c'mandé à ces sé

à ses soudards dé faithe lus part:

touos les p'tchiots machacrer

J'ai-t-i' pitchi pouor té, man p'tit,

et j'en plieuth'thai acouo!

J'né t'lâqu'thai pon sans chute chanson:

Lô-lô, lô-lô, lô-lô

Lô-lô, lô-lô, dors ilo pétit p'tchiot

Lô-lô, lô-lô, lô-lô

Lô-lô, man p'tit p'tchiot

Lô-lô, lô-lô, lô-lô

J'voudrais qu'ché sait chèque jour lé jour dé Noué

Oh, quand l'bouanhomme apporte la né
ofûche il aim'thait bein saver
qu'sus des faches il a mîns un bein grand souôri
Si tu t'couoche dédans tan liet
èrcaûffe-té souos tan blianket
laïsse l'us débarré tu sai qu'lé bouan Papa Noué est d'appréchi

Bein j'voudrais qu'ché sait chèque jour lé jour dé Noué
quand les mousses chant'taient et les sonneurs es'saient à jouer
Oh j'voudrais qu'ché sait chèque jour lé jour dé Noué
Sonnez les clioches pouor l'matîn d'Noué

Quand j'sommes dans l'par à patîns
si eune néthe froid est pouor v'nîn
pis tes joues en rose m'êcliaith'thont lé bieu c'mîn
et achteu y'a des candelles
dans ma barbe, ch'est qu'i' la gèlent
Couochons-nous l'avant au feu qu'les rêves les fondent dévant l'matîn

Bein j'voudrais qu'ché sait chèque jour lé jour dé Noué
quand les mousses chant'taient et les sonneurs es'saient à jouer
Oh j'voudrais qu'ché sait chèque jour lé jour dé Noué
Sonnez les clioches pouor l'matîn d'Noué

Oh, quand l'bouanhomme apporte la né
ofûche il aim'thait bein saver
qu'sus des faches il a mîns un bein grand souôri
Si Jean Noué cache san traîné
l'travèrs du ciel ètailé
j'ècriv'thai man nom dans la né sus l'lief pouor qu'i' vielle rester

Bein j'voudrais qu'ché sait chèque jour lé jour dé Noué
quand les mousses chant'taient et les sonneurs es'saient à jouer
Oh j'voudrais qu'ché sait chèque jour lé jour dé Noué
Sonnez les clioches pouor l'matîn d'Noué

Y'a du bouon, mousses, allez

Bein j'voudrais qu'ché sait chèque jour lé jour dé Noué
quand les mousses chant'taient et les sonneurs es'saient à jouer
Oh j'voudrais qu'ché sait chèque jour lé jour dé Noué
Sonnez les clioches pouor l'matîn d'Noué

Chârez aue tous vot' amour ches Noué

quand l'bouanhomme apporte la né
quand l'bouanhomme apporte la né
quand l'bouanhomme apporte la né...

I wish it could be Christmas everyday

La Chanson d'Noué (Y'a des marrons à rôti sus l'feu)

Y'a des marrons à rôti sus l'feu
l'ouaîsé à rouoge bé est d'houors
y'a des cantiques chantés par un tchoeu
et l'monde sont abriés d'amors

Tout l'monde sait qu'un picot et du dgi
font la saison jouaiyeuse et cliaithe
et ches p'tchiots tch'ont l's ièrs bein rêvilyis
à ces sé n's'endormithont dgéthe

I' savent qu'i' veindra, Papa Noué
il a chèrgi un tas d'jouettes sus san traîné
et chèque pétchiot s'en va rester au dget
pouor vaie si les chers pouor lé vrai peuvent voler

Don j'vos propose chu sîmpl'ye pétit souhait
ès mousses, ès vièrs et à tous
Ouaithe qu'nou l'ait dit partout l'monde bein des fais
un raide Bouan Noué à vous

Don j'vos propose chu sîmpl'ye pétit souhait
ès mousses, ès vièrs et à tous
Ouaithe qu'nou l'ait dit partout l'monde bein des fais
un raide Bouan Noué
un raide Bouan Noué
un raide Bouan Noué à vous

Lé Cantique du Vièr Noué

Aniet ch'èrest lé six d'Janvyi:
un Bouan Vièr Noué!
J'avons bu et j'avons mangi:
tchi Bouan Vièr Noué!
Dansons et faîthons rêvillon,
l'Hivé n'duthe pon trop long.
L'année tchi c'menche s'sa remplyie d'ji:
un Bouan Vièr Noué!

Aniet ch'est Noué au mais d'Janvyi:
chu Bouan Vièr Noué!
Not chaûdé est bein êpici
au Bouan Vièr Noué!
La saison d'Noué veindra à fin,
doux comme du chucre scandîn.
J'éthons d'la gâche et acouo d'tchi:
un Bouan Vièr Noué!

L'vez vos vèrres à Noué en Janvyi:
au Bouan Vièr Noué!
À la santé d'la compangnie:
un Bouan Vièr Noué!
Dé tchi bein fait est fait deux fais;
et j'èrfêtons chu mais.
Au Nouvel An, not' Noué est vyî:
un Bouan Vièr Noué!

Air: Cantique 186, Recueil de Cantiques Méthodiste, 1889



Sav'-ous comme tchi craît' des arb's dé Noué?

Sav'-ous comme tchi craît' des arb's dé Noué? Auve du solé.
L'solé n'peut pon les craît' à san gré. I' faut d's achies.
L's achies n'peuvent pon craît' ches'-là. Et né v'chîn pourtchi:
En Hivé la plyie gèl'la et l's arb's vont mouothi.

*Sav'-ous comme tchi craît' des arb's dé Noué?
I' faut l'solé et d's achies, d's anmîns, d'la bouônté,
et pus qu'chenna, faut d'l'amour.*

Sav'-ous comme tchi qu'i' veint, Papa Noué: Auve des brîns d'né.
Les brîns d'né n'peuvent dgéthe lé faithe voler: i' faut des chers.
Les chers veulent bein y'éprouver, sans pouver d'couôteunme.
I' daivent voler eune bordée, et i' n'ont pon d'plieunmes.

*Sav'-ous comme tchi qu'i' veint, Papa Noué?
I' faut d'la né et des chers, l'solé et d's achies,
d's anmîns, d'la bouônté, et pus qu'chenna, faut d'l'amour.*

Sav'-ous comme tchi graie des cartes dé Noué? Auve des portraits.
Des portraits n'peuvent pon l's ag'ver, j'ai r'gret; I' faut des souhaits.
Des souhaits dithent chein tch'est dans l'tchoeu, écrit dans des mots,
Mais pour rêjouï l'èrchéveux, il en faut acouo.

*Sav'-ous comme tchi graie des cartes dé Noué?
Faut des portraits et des souhaits, d'la né et des chers, l'solé et d's achies,
d's anmîns, d'la bouônté, et pus qu'chenna, faut d'l'amour.*

Do you know how Christmas trees are grown?

Driving home for Christmas

Jé m'rad'dai siez mé ches Noué
J'veurs èrvaie ches faches d'anmîns
Jé m'rad'dai siez mé ches Noué, véthe
bein, j'en trouv'thai l'miyeu c'mîn
J'ai 'té à banon
mais j'y'arriv'thai
auve chutte chanson
pouor rêjoui l'tchoeu tout comme
Jé m'rad'dai siez mé,
j'cach'chai siez mé ches Noué
v'là tchi m'prend du temps mais j'arriv'thai

J'èrvail'lai siez mé ches Noué
J'èrvèrrai mes chièrs et chiéthes
J'èrvail'lai siez mé ches Noué, véthe
j'pâss'sai La Corbiéthe
et j'té chant'tai
par sus les louêmes
chutte chanson d'jouaie
pouor té rêjoui d'même
J'èrvail'lai siez mé,
Jé m'rad'dai siez mé ches Noué

J'rîthai siez mé ches Noué
acanté mille mémouaithes
j'èrgarde lé viageux au ras d'mé
un compangnon
man compangnon

J'èrvol'lai siez mé ches Noué
tout lé travers d's étailes
J'èrvol'lai siez mé ches Noué, véthe
en r'dévalant du ciel
et j'té chant'tai
du haut en bas
chutte chanson d'jouaie
tchi t'rêjouitha
J'èrvol'lai siez mé,
Jé m'rad'dai siez mé ches Noué

Jé m'rad'dai siez mé ches Noué
acanté mille mémouaithes
j'èrgarde lé viageux au ras d'mé
un compangnon
man compangnon,

siez nous ches Noué
siez nous ches Noué

Lé Cantique des Brandons

Brandons, brandons, auve nos brandons
couothons vaie lé p'tchiot dans l'tro.
Christ est né, et j'l'adouoth'thons.
Couothons lî chanter lô-lô.

Ah, lô-lô, lô-lô, chièr pétit.
Ah, lô-lô, lô-lô, man p'tchiot.
Dors en paix où'est qu'châque brandon lit
quandi qu'jé t'chantons lô-lô.

Chantons, m's anmîns, séyons rêjouis:
jouaie et leunmiéthe tréjous.
Nos brandons sont à êcliaithi
l'êfant tch'a 'té né pouor nous.

Lé Cantique des Animaux

Dans l'êtabl'ye, l'âne et l'boeu
braient lus cantique dé jouaie.
Lé v'là lé p'tchiot achteu;
les animaux lé vaient.

Lé j'va hale lé hèrnais
à fain pour faithe san liet
pouor qu'il y dorme en paix
siez l's animaux à Noué.

L'agné et la brébis
vil'yent sus chu saint êfant.
Lus bêlement va l'bèrchi
si douochement, si douochement.

Ronne, colombe; tuite, marté!
Racontez la mèrvelle!
Lé cahouain dans la niet
la crie jusqu'ès étailes.

La bête à saie, ou honne
dans l'êtabl'ye où'est qu'i' s'tâne.
Ch'est l'salut qu'i' nos donne
acanté l'boeu et l'âne.

Air: Cantique 67, Recueil de Cantiques Méthodiste, 1889



Dans les cieux

Ès prés, ès côtis, ès mielles, ès mathais,
jé chèrchons lé p'tchiot tchi nos appathaît.
Ès mielles, ès mathais, ès prés, ès côtis,
j'sommes à viagi aue nos belles brébis.

*Dans les cieux
vil'yent en tchoeu
des anges tchi chantent la glouaithe à Dgieu.
Où'est qu'il est?
Né aniet,
pouor nous un Saûveux, ches fêtes dé Noué.*

Ès clios, ès bouaïs'sies, ès monts, ès gardîns,
jé chèrchons l'chein tchi nos a 'té promîns.
Ès monts, ès gardîns, ès clios, ès bouaïs'sies,
j'sommes à viagi souotre l'étaile tchi lit.

*Dans les cieux
vil'yent en tchoeu
des anges tchi chantent la glouaithe à Dgieu.
Où'est qu'il est?
Né aniet,
pouor nous un Saûveux, ches fêtes dé Noué.*

Ès villes, ès caûchies, ès pièches, ès chapelles,
 jé chèrchons la vie, l'salut ètèrnel.
 Ès pièches, ès chapelles, ès villes, ès caûchies,
 j'sommes à viagi canté Jêsû Chri.

*Dans les cieux
 vil'yent en tchoeu
 des anges tchi chantent la glouaithe à Dgieu.
 Où'est qu'il est?
 Né aniet,
 pour nous un Saûveux, ches fêtes dé Noué.*

Air: Cantique 197, Recueil de Cantiques Méthodiste, 1889



Index de titres dans les langues originnales

<i>Adeste fideles</i>	6
<i>All I want for Christmas is you</i>	89
<i>Angels from the realms of glory</i>	21
<i>As with gladness men of old</i>	28
<i>Away in a manger</i>	84
<i>Byla cesta, byla ušlapaná</i>	118
<i>Cherry tree carol</i>	146
<i>A Christmas Lullaby</i>	125
<i>The Christmas Song (Chestnuts roasting on an open fire)</i>	154
<i>Come thou fount of every blessing</i>	104
<i>O come, o come, Emmanuel</i>	8
<i>Coventry Carol</i>	151
<i>Deck the halls</i>	27
<i>Ding-dong merrily on high</i>	35
<i>Do you know how Christmas trees are grown?</i>	156
<i>Driving home for Christmas</i>	157
<i>Eastern Monarchs, Sages Three</i>	139
<i>The first Nowell</i>	18
<i>The Friendly Beasts</i>	85
<i>God rest you merry gentlemen</i>	14
<i>Hark the Herald Angels sing</i>	68
<i>Hajej, nynej / Rocking Carol</i>	121
<i>Have yourself a merry little Christmas</i>	123
<i>Here we come a wassailing</i>	130
<i>The Holly and the Ivy</i>	12
<i>I heard the bells on Christmas Day</i>	75
<i>I saw three ships</i>	66
<i>I wish it could be Christmas everyday</i>	152
<i>I'm dreaming of a white Christmas</i>	145
<i>In the bleak midwinter`</i>	16
<i>It came upon the midnight clear</i>	30
<i>It's beginning to look a lot like Christmas</i>	150
<i>Jesus Christ the Apple Tree</i>	76
<i>Jingle bells</i>	34
<i>Joy to the world</i>	64
<i>Let It Snow! Let It Snow! Let It Snow!</i>	142
<i>Little donkey</i>	70

<i>Little drummer boy</i>	59
<i>O little town of Bethlehem</i>	42
<i>The Lord at first did Adam make</i>	80
<i>Mary's Boy Child</i>	50
<i>Minuit, chrétiens</i>	105
<i>Noël Nouvelet</i>	133
<i>Nous voici dans la ville</i>	94
<i>Ny Drogh Vraane</i>	92
<i>Oïkan ayns Bethlehem</i>	96
<i>Once in Royal David's city</i>	32
<i>Půjdem spolu do Betléma</i>	114
<i>Personent hodie</i>	20
<i>Rockin' around the Christmas tree</i>	148
<i>Rudolf the red-nosed reindeer</i>	49
<i>Santa Claus Is Comin' to Town</i>	82
<i>Santa Lucia</i>	132
<i>See amid the Winter's snow</i>	97
<i>Silver Bells</i>	87
<i>Slyšte, slyšte pastuškové</i>	116
<i>Stille Nacht / Silent Night</i>	11
<i>Sussex carol</i>	33
<i>O Tannenbaum / O Christmas Tree</i>	17
<i>Torches</i>	159
<i>The twelve days of Christmas</i>	22
<i>Walking in a Winter wonderland</i>	65
<i>Walking in the air</i>	124
<i>We three kings</i>	52
<i>We wish you a merry Christmas</i>	10
<i>When a child is born</i>	113
<i>While shepherds watched</i>	26
<i>Wonderful Christmastime</i>	109
<i>Zezulka</i>	117

